



# Wantok

Niuspepa Bilong Yumi Oi PNG Stret!

K1 tasol

pepsi pipol



Namba 2163

Febueri 25 - Mas 2, 2016 28 pes

MAS SPESOL  
**GUTPELA**  
COMESOL  
PLASTIK SIA  
PLASTIK SIA WANTAIM HAN SAPOT  
LONG THEODIST TASOL

**K29.70**  
\*GAT LO TASOL  
Code: YONNY

PROMOSEN BAI ISTAP INAP NAMBA 31 DEI BILONG MUN MAS 2016 O INAP STOK PINIS

Only at...  
**THEODIST**  
THE STATIONERY SUPERMARKET  
Waigani Drive, P.O.M.  
Ph: 313 9800  
sales@theodist.com.pg  
Markham Road, LAE  
Ph: 472 5488  
saleslao@theodist.com.pg  
MP/16/42306

Riviу long  
Kumul marin  
teminal i mas  
kamap -  
P2



# Pasin kastom bai painimaut oi LNG papagraun

As tru bilong em long painimaut ol  
rot bilong sekim ol papagraun tru  
bilong projek eria...

GAVMAN bai no inap kamapim nupela stail na we bilong sekim, glasim na painimaut gut ol papagraun tru bilong PNG LNG Projek eria, Petroleum na Eneji Minista, Ben Micah, i tok.

Tasol gavman bai bihainim pasin kastom bilong wan wan LNG Projek eria long painimaut husat tru i papagraun.

Minista Micah i bin mekim dispela toktok taim em i bin makim maus bilong nesenel gavman na bungim ol papagraun bilong wan wan LNG Projek eria wantaim lida bilong ol.

Mista Micah i bin bungim ol long Pot Mosbi long Mande na Tunde dispela wik long toktok long ol isu bilong PNG LNG Projek, we em i bin kisim tingting na toktok bilong ol memba, gavana, kaunsil presiden na ol lenona lida.

As tru bilong dispela bung em long painimaut ol rot bilong sekim ol papagraun tru bilong projek eria na tu, long sekim gen hamas mani ol papagraun i bin kisim aninit long ambrela benefit sering agrimen (UBSA).

Mista Micah i tok gavman bai no inap kamapim nupela we bilong mekim ol wok painimaut long sekim na painimaut ol papagraun, tasol gavman bai yusim pasin bi-

long ples long painimaut husat man o lenona grup i gat graun long ol wan wan projek eria.

"Yumi save graun long PNG em i stap aninit long ol papagraun yet. Ba yumi go bek gen long pasin bilong ples long sekim husat i papagraun tru," Mista Micah i tok.

Dispatmen ov Petroleum na Eneji i wok long mekim ol klen veting proses (CVE) long sekim husat tru i lenona.

Ripot bilong dispela CVE i no bin stret long sampela ol papagraun, husat i bin kisim kot oda na stopim ol wok painimaut.

Bihian long dispela, Nesenel Kot Jas, Jastis Ambeing Kandakasi, i bin kamapim wapelala wok painimaut ol i kolin altanetiv disput risolusen (ADR).

Dispela ADR i bin sekim gut na painimaut ol papagraun bilong Angore PDL 8 na sampela long Hides.

Minista Micah i bin wanbel long dispela wok painimaut Jastis Kandakasi i bin mekim bikos dispela i karim kaikai taim em i painimaut ol papagraun tru bilong Angore PDL 8.

"Mi wanbel long yumi bihainim pasin kastom long kisim graun na kamap papagraun," Mista Micah i tok.

Em i tok bihain long dispela, nem bilong olgeta manmeri husat

i papagraun, bai go insait long NID na ol bai kisim ID kad bilong ol.

"Bai yumi kamapim wanpela straksa we ol papagraun bai wanbel na skelim mani gut.

Olgeta royalti mani bilong yu-pela i stap yet long tras akaun long Benk ov PNG.

"Bai yupela i kisim dispela mani

taim mipela i pinisim dispela ol wok. Na mi nidim sapot bilong yu-pela olgeta. Yumi mas wokbung wantaim na mekim dispela wok," Mista Micah i tok.

Minista i tok em i laik kamapim wanpela sistem we ol papagraun bai kisim royalti mani bilong ol insait long wanpela de tasol taim

kampani i salim ges i go aut long ovassis maked.

Em i tok ol bai sekim tu hamas mani gavman i givim long ol papagraun, wanem ol papagraun i kisim na i no kisim, na tu sekim wanem ol projek aninit long UBSA i kamap na wanem projek i no kamap yet.



Moa stori long pes 7

**Friends**  
**"Kaibigan"**  
**"Wantoks"**

**MANILA**  
**k1,708\***  
RETURN

Call toll free 180 3444 for more information.

Air Niugini   
www.airniugini.com.pg

\*Ex Port Moresby. Conditions Apply.

# WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Laikim Facebook peis na postim foto bilong yu wantaim bilum yu karim na yu bai gat sans long winim. (Fopela inap long winim. Wanpela long wanwan region)

PMM27969b

go to **FlameFlourPNG** on Facebook



## Riviu bilong Kumul marin terminal i mas kamap

OL papagraun bilong hap solwara we Kumul Marin Teminal bilong Oil Search i stap long Galp ov Papua i laikim wanpela riviu i mas kamap.

Gavana bilong Galp Provins, Havila Kavo, i tok em i makim maus bilong ol papagraun long Galp provins na singautim gavman na Oil Search long kamapim dispela riviu hariap.

"Mi laikim wanpela riviu i mas kamap hariap. Na dispela riviu

i mas kamap hariap," Mista Kavo i tok.

Gavana Kavo i tokim Ministra bilong Petroleum na Eneji, Ben Micah, long lukluk go insait long dispela asua bikos ol papagraun i no bin kisim wanpela mani o benefit long kampani i yusim solwara na graun bilong ol long kirapim na sanapim dispela teminal.

Kumul Marin Teminal i em stap 25 kilometer long solwara

bilong Galp. Em i wankain olsem PNG LNG Plent, Mista Kavo i tok.

Ol bikpela sip bilong karim oil we ol i kolim oil tenka i save kam sua long Kumul Marin Teminal na kisim oil bilong Gobe, Kutubu, Moran na Agogo i go aut long ovasis.

Mista Kavo i tok dispela marin teminal i wankain olsem PNG LNG Plent o Napa Napa refaineri ausait Pot Mosbi.

"Em i no gat wan-

pela difrens. Em i wankain olsem LNG plent o refaineri. Ol papagraun bilong LNG plent na refaineri i kisim benefit.

"Tasol ol papagraun bilong Galp i no bin kisim wanpela benefit o mani bilong kampani i sanapim dispela oil ekspot fasiliti antap long solwara na graun bilong mipela.

"Long dispela as, mi laikim wanpela riviu bilong dispela marin teminal i mas kamap," Mista Kavo i tok.

## Gavman laikim senism pablik sekta

PRAIM Ministra Peter O'Neill i laik sotim namba bilong pablik sevan na arapela ol wok manmeri bilong gavman.

Dispela em i wanpela rot we gavman i lukluk long stretim na senism pablik sekta bikos pablik sekta i save kisim bikpela mani long gavman long olgeta yia aninit long ol nesenel baset.

Mista O'Neill i tok pablik sekta em i kamap olsem wanpela 'monsta' bikos em i wok long sotim gavman mani long olgeta yia tasol i no save mekim sampela mani na givim i go bek gen long gavman i ranim kantri.

Mista O'Neill i autism dispela toktok long 2016 Lidas Samit bung long Pot Mosbi las wik Fonde we em i bin tok pabik sevis em i olsem wanpela bikpela enimal o monsta we i save pinisim moa mani bilong gavman.

"Olgeta yia gavman i wok long givim moa long 60 pesen mani bilong nesenel baset i go long pablik sekta. Pablik sekta

i no save mekim wanpela winmani na givim i go bek long larim gavman i yusim na kirapim kantri," Mista O'Neill i tok.

Sif Seketeri bilong Gavman, Isaac Lupari, i sapotim dispela toktok bilong Praim Ministra O'Neill.

"Yes, em i tru tumas pablik sekta em i wan-

pela bikpela 'monsta' yumi gat long PNG. Moa long 60 pesen mani bilong nesenel baset i save long long pablik sekta tasol ol em i no save mekim wanpela mani na givim i go bek gen long gavman i ranim kantri," Mista Lupari i tok.

Mista O'Neill i tok bikpela salens bilong gavman em long senism pablik sekta na bringim sampela rifom kam insait long pablik sevis.

"Salens bilong yumi em long katim daun ol no gut samting we i wok pasim gavman long kirapim ikonmi na groim ol bisnis.

"Em mas kamap long olgeta pablik sekta na

long olgeta gavman dip-tamen.

"Yumi mas wokbung wantaim ol investa na ol bisnis haus insait long kantri.

"Yumi mas wok hat long daunim ol pasin no gut bilong sampela ol wan wan manmeri long PNG. Yumi mas soim gutpela lidasip na pablik sevis i mas mekim gut wok.

"Yumi mas painim ol ansa bilong sampela hevi yumi wok long bungim long kantri.

"Em i gutpela tru sapos yumi bilip long yumi yet na lukluk i go bek long sampela ol gutpela samting kantri i bin mekim. Dispela bai strongim yumi long sanap strong olsem wan nesen na wok hat long kirapim kantri bilong yumi.

"Yumi mas senism ol sistem bilong gavman long larim gavman i mekim bisnis bikos PNG i gat planti risos na gavman i mas mekim bisnis long kirapim ikonomi," Mista O'Neill i tok.

## Oil Search, ExxonMobil mas opim opis long Tari

TUPELA biknem kampani husat i go pas long PNG LNG Projek i mas opim opis long Tari, Hela Provins.

Dispela em i toktok i kam long Hela Provinsal Administrata William Bando. Mista Bando i laikim dispela tupela kampani long stap long graun wantaim ol pipel na lokal komyuniti lida.

"Mi laikim Oil Search na ExxonMobil long



**William Bando**

opim opis long Tari. Tupela i no ken stap long Pot Mosbi na taim wanpela hevi o trabel i

kamap, hariap tru ol i save kolim mipela long sekim na stretim.

"Mipela i les long dispela. Tupela kampani i mas gat opis long Tari. Moa long 90 pesen ges na oil tupela i kisim i kam long Hela, i no long Pot Mosbi.

"Tupela kampani i mas opim opis long Tari na stap wantaim ol pipel long hia," Mista Bando i tok.

**Liklik moni,  
bikpela toktaim**

Kisim long **K49** tasol.



Customer Care 76003555  
support@bmobile.com.pg

Offer valid till 29th of February 2016 or till stocks last.

[www.bmobile.com.pg](http://www.bmobile.com.pg)



With  
**Free SIM**

**300 + voice mins**  
Between  
Imobile-vodafone numbers.  
Valid for 3 months.

**300 + sms**  
Between  
Imobile-vodafone numbers.  
Valid for 3 months.

FM Radio  
Music Player  
2 MP Camera  
Torch



# Bihainim stail bilong Israel



kapenta, welta na arapela tredsmen.

"Taim ol yangpela manmeri i pinisim skul, ol i save mekim ol wok long ol infomol sekta na statim laip.

"Mi laik askim gavman long lukluk long dispela kain stail na sistem long larim planti yangpela manmeri bilong yumi i kisim save na mekim sampela gutpela wok long kirapim kantri na ikonomi bilong PNG," Mista Wobiro i tok.

Praim Minista Peter O'Neill i tok gavman i luksave long dispela na i kamapim fri edukesen polisi long larim ol yangpela manmeri i kisim save na painim wok.

"Nau em i 4 yia nau. Plantol yangpela pikinini bilong yumi i stap long skul. Gavman i luksave long dispela na i kamapim fri edukesen polisi," Mista O'Neill i tok.

Mista O'Neill i tok fri edukesen polisi bilong gavman i givim sans long ol yangpela manmeri long go skul, kisim save na kamapim gutpela sindaun.

"Edukesen em i nambawan samting. Gavman i luksave long dispela na bai mipela i larim dispela polisi bilong fri edukesen i stap yet.

"Dispela polisi i wok long helpim planti ol papamama husat i gat pikinini tasol no gat mani long baim skul fi," Mista O'Neill i tok.

WESTEN Gavana Ati Wobiro i tok PNG i mas bihainim stail bilong Israel long skulim ol yangpela manmeri na helpim ol long painim na kisim wok.

Gavana Wobiro i tok populen bilong kantri i wok long gro i go antap long 8 milien manmeri, na hap namba bilong dispela em ol yangpela manmeri.

"Plantol dispela yangpela manmeri i no gat gutpela save na i hat long ol i painim wok mani," Mista Wobiro i tok.

Em i tok Israel i gat ol teknikel skul na vokesenel skul we kain ol yangpela manmeri i save skul na kisim save long mekim wok long infomol sekta.

"Israel i gat planti ol vokesenel skul bilong skulim ol yangpela manmeri long kamap

man wantaim.

Mista O'Neill i tok ol diplomat i mas toksave ariap long Gavman long wanem samting i kamap long ol arapela ausait kantri na wol.

"Gobel ikonomi i no staphut taim prais bilong ol komoditi samting i go daun. Ikonomi bilong Saina tu i wok long go daun na dispela bai kamapim hevi long PNG bikos Saina em i wanpela treding patna bilong yumi," Mista O'Neill i tok.

# Ikonomi gro long 9.4 pesen GDP

**PRAIM Minista Peter O'Neill i tok ikonomi bilong kantri i wok long gro strong yet maski ol komoditi prais bilong ol samting i pundaun i kam daun long intanesen maket.**

Mista O'Neill i tok Benk ov PNG (BPNG) i toksave pinis long em olsem ikonomi bilong PNG i wok long gro na dispela i lukim GDP tu i wok long gro long 9.4 pesen olgeta yia.

Mista O'Neill i mekim dispela toktok las wik Fonde long bung bilong Lidas Samit long Pot Mosbi.

"Stat long yia 2011 i kam inap long yia 2015, ikonomi bilong PNG i wok long gro na dispela i lukim GDP i wok long gro long 9.4 pesen long wan wan yia," Mista O'Neill i tok.

Em i tok las yia tasol, GDP i gro long 9.2 pesen.

"Mi tokim yupela, yumi mas gat strongpela bilip long ikonomi bilong kantri bilong yumi.

"Gro bilong ikonomi na GDP bilong dispela kantri i winim ol arapela kantri long wol.

"Dispela em i soim olsem mipela i menesim ikonomi bilong dispela kantri gut. Na mipela i putim mani i go insiat long



Polye

ol rait sekta we dispela ol sekta bai helpim manmeri na kantri long strongim dispela gro bilong ikonomi," Mista O'Neill i tok.

Em i tok dispela em i tok promis gavman i bin mekim long yia 2012 taim O'Neill i kamap praim minista.

"Bai mipela i strongim dispela gro bilong ikonomi. Mipela i tokim ol provinsal gavman tu long bihainim polisi na plen bilong nesen gavman long kirapim moa bisnis na invesmen.

"Dispela bai mekim yumi i lukluk go bek long sampele ol no gut samting bin kamap long menesmen bilong ikonomi

"Dispela bai helpim yumi long plen gut long



O'Neill

givim ol sevis long pipel. Yumi gat ol wok manmeri husat i redi, mani mak bilong mekim wok em i no bikpela tumas na ol benk i gat moa mani long helpim yumi," Mista O'Neill i tok.

Mista O'Neill i tok nau em i gutpela taim long inves na putim mani i go insiat long ol bisnis na samting bilong kirapim ikonomi.

Oposisen Lida Don Polye i tok ikonomi bilong PNG i no staphut long han bilong Praim Minista Peter O'Neill.

"PNG i gat moa long K27 bilien dinau na dispela mak bilong dinau bai no inap stop long dispela level.

"PNG bai holim ol bikpela bung olsem APEC

na arapela ol bikpela bung tasol mak bilong dispela dinau bai no inap stop. Em bai go antap yet.

"Total veliu bilong ikonomi bilong PNG em i K41 bilien tasol. Mi pret long lukim olsem dinau level bilong PNG i go antap moa long 60 pesen Debt tu GDP resio," Mista Polye i tok.

Mista Polye i tok sapos gavman i no menesim gut ikonomi bilong PNG, dispela kantri bai bihainim wankain rot we kantri Greece i bin bihainim na kamapim bikpela hevi bilong mani na ikonomi.

"Praim Minista O'Neill i wok long tok ikonomi bilong yumi i stap gut na kantri i ran long gutpela han bilong gavman tasol em i no tokaut moa long olsem wanem stret kantri i ran gut.

"Praim Minista i no gat ol plen bilong abrusim dispela bikpela hevi bilong ikonomi tasol em i tingting long yusim mani, kisim moa dinau mani na nau em i tingting long salim sovren bond.

"Ol bikpela benk i lukim na save olsem ikonomi bilong PNG i no staphut. Ol bai no inap baim sovren bond bilong PNG," Mista Polye i tok.

## O'Neill tokim ol diplomat long wokbung

PRAIM Minista Peter O'Neill i tokim olgeta diplomat o ol hai komisina na ol ambaseda biong PNG i go long ol arapela kantri long lukluk gut na wokbung na wok strong long apim nem bilong kantri bilong yumi, PNG.

Mista O'Neill i mekim dispela toktok las wik taim em i bungim ol het bilong wanwan embasi na hai komisin bilong PNG long ol arapela kantri long wol we PNG i gat poro-

"Ol ambaseda na hai komisina bilong PNG i wok staphut long ol arapela kantri ausait long makim maus bilong gavman bilong yumi na long tokim gavman long wane mol salens ol arapela kantri na gavman i wok long bungim long ol arapela kantri ovasis.

"Gavman bilong yumi i wok long kamapim gutpela poroman wantaim ol arapela kantri na dispela

dispela i wok long karim planti gutpela kaikai.

"Yupela i bos bilong ol embasi na hai komisina bilong PNG long ol arapela kantri na gavman i laikim yupela long bilip long yupela yet, wokbung wantaim na sanap gut na putim intres bilong dispela na ol pipel i go pas long ol wok yupela i save mekim," Praim Minista O'Neill i tok.

"Namba wan wok bilong yumi

olgeta em long makim maus bilong kantri bilong yumi na mi amemas olsem yupela tu i amamas long makim maus bilong dispela kantri.

"Yupela olgeta i gat bikpela ekspirens long mekim wok long wan wan kantri yupela i stap na gavman i laikim yupela long kamap olsem bris namel long kantri bilong yumi na wane mol kantri yupela i stap," Mista O'Neill i tok.

are you **Savings fit?**

Give your savings a workout by opening a **PLUS SAVER**, **TERM DEPOSIT** or **KIDS SAVINGS ACCOUNT** today.

**Weekly Smartphone Giveaway:**  
Simply open a new **BSP Plus Saver, Term Deposit** or **Kids Savings Account** before 31<sup>st</sup> March, 2016.

**BSP**

www.bsp.com.pg



# Rivi bilong dispela wika...

## Kas tokaut long K200 milien long stretim Madang taun rot

James G. Kila i raitim

**WANPELA** konsalten tim bilong projek menesmen yunit bi-long Madang provinsal gavman nau i wok long kamapim awenes na kisim namba na rekot bilong ol ples, haus na bisnis haus arere long ol bikpela rot long Madang taun.

Dispela awenes em long redim ples long bikpela developmen i kamap long stretim na opim ol rot insait long Madang taun.

Madang provinsal edministreta, Daniel Aloi long stat bilong dispela mun i salim toksave i go long olgeta bisnis haus long taun olsem dispela awenes na konsaltensi program i karamapim olgeta eria arere long ol bikpela rot insait



Dispela seksten bilong rot name long Madang taun klostu long Andersons supamaket nau i bagarap tru. Poto: James Kila

long Madang taun.

Ol bikpela rot insait long Madang taun we dispela aweanes na konsaltensi lain i wok-abaut raun long kisim infomesen em long ol lain i gat taitel long graun na tu, ol lain i gat propeti i stap arere

long ol bikpela rot insait long Madang taun.

Mista Aloi i tok ol bikpela rot long taun we konsalten i wok long raun kisim infomesen bikos divelopmen bai kamap long en em long Nabasa rot (stat long Tusbab Sek-

enderi skul i go long mausrot bilong Divine Wod Yunivesiti na go olsem long ples balus.

(Yabob rot i go Modilon mausrot) Baidal Rot (Jomba mausrot i go long ples-balus) Not Kos Rot (Handy Mart i go Pab-

lik Tenk).

Gavana bilong Madang, Jim Kas insait long wanpela nius konferens o kibung wantaim ol nius lain i tok ol pipel bilong Madang i mas stap isi tasol wantaim bel-isi bikos bikpela developmen bai kamap long Madang taun.

Mista Kas i tokaut olsem ol hevi bilong rot nogut insait long Madang taun em klostu taim bai wok i kirap long stretim.

Gavana Kas i tokaut olsem Nesenel Gavman bai givim K200 milien long stretim na opim Madang taun rot long redi long bikpela APEC (Esia Pasific Ekonomik Komyunit) kibung we bai lukim wanpela miting bilong en bai kamap long Madang.

OPOSISEN Lida Don Polye i no pret long Praim Minista Peter O'Neill i laik kotim em.

"Mi no pret long Praim Minista i laik kotim mi. Mi tokaut stret long gavman i mas bihainim stret lo long mekim ol samting," Mista Polye i tok.

Em i mekim dispela toktok asde taim Mista O'Neill i laik kotim em long em i bin raitim wanpela pas i go long Sif Jastis Sir Salamo Injia long Januari 21.

"Mi bin raitim dispela pas i go long Sif Jastis long ske-lim gut ol kontrakta husat i bin resis long winim kontrak long kirapim nupela Suprim Kot haus long Waigani," Mista Polye i tok.

Mista Polye i tok em i bin askim Sif Jastis long lukluk gut long stretpela pasin long makim kontrakta husat bai kirapim dispela haus.

"Mi mekim stretpela toktok. Gavman i no ken mekim paul pilai na wantok sistem taim em i laik givim kontrak i go long ol kampani," Mista Polye i tok.

Long wanpela pas Praim Minista O'Neill i raitim i go long Mista Polye asde, Mista O'Neill i tok em bai askim ol loya bilong em long skelim sapos toktok bilong Polye i brukim lo o no gat.

Sapos toktok bilong Polye i no stret long lo, Mista O'Neill i tok em bai kotim Mista Polye na sasim em.

## Polye: Mi no pret long O'Neill



OPOSISEN Lida Don

## PNG i no gat ges polisi

PNG i kirapim pinis wol klas PNG LNG Projek tasol em i no gat wanpela polisi bilong kamapim ol ges projek, Galp Gavman Havila Kavo i tok.

Taim namba tu Papua LNG Projek i wok long kirap isi isi, Gavman Kavo i tok kantri i no gat wanpela gutpela polisi, tasol gavman i wok long larim ol bikpela ges projek i kamap.

"PNG i no gat wanpela polisi bilong ges. Gavman i wok long toktok long domestik maket obligesen (DMO), daunstrim prosesing (DSP), petrokemikel industri na ol arapela samting i kam wantaim ges projek.

"Tasol yumi no gat wanpela polisi. Polisi bai soim rot long wanem samting gavman i ken mekim sapos ges projek i kamap.

"Tasol yumi no gat wanpela polisi. Nesenel Ges Polisi bilong kantri i mas stap," Mista Kavo i tok.

Mista Kavo i tok gavman i mas lukaumol ol pipel na banisim risos bilong kantri wantaim graun bilong dispela kantri.

"Plantu samting long dispela kantri i no stap gut," Mista Kavo i tok.

## Gavman mas bihainim UBSA



Don Polye, James Marape, William Bando na Philip Undialu long Hides 4 long yia 2011.

plantu ol samting olsem arapela sevis we ol papagraun na ol provisal gavman inap long kisim.

"Gavman i givim sam-pela mani long ol papagraun. Dispela ol mani i kam aninit long bisnis developmen gren (BDG), infrastraksa developmen gren (IDG) na arapela ol mani," Mista Marape i tok.

Tasol Mista Marape i tok gavman i no givim

tok long dispela wika... Tunde long Pot Mosbi we ol papagraun na ol lida bilong provins we PNG LNG Projek i kamap i bin bungim Petroleum na Eneji Minista, Ben Micah, we ol i bin stretim toktok long lukluk go bek gen long sampela ol isu bilong papagraun.

Oposisen Lida Don Polye i bin singautim gavman long taim yet long bihainim dispela agrimen na luksave long ol na helpim ol.

graun bilong Hela, Sauten Hailans, Westen, Galp na Sentral Provins.

"Gavman i no ken yusim mani bilong ol papagraun na kisim moa dinau mani. Mani biong papagraun i mas go long ol papagraun."

Gavman i mas bihainim Kokopo UBSA agrimen. No ken mekim nabaut. Ol papagraun em ol pipel bilong yumi, gavman i mas luksave long ol na helpim ol.

## O'Neill tok sori long memba i dai

MEMBA bilong Saut Bogenvil, Steven Pirika Kamma, i dai long Sande long Manila, Filipins we em i bin laik long go long haus sik.

Praim Minista Peter O'Neill i bin harim dispela nius na em i makim maus bilong gavman na pipel bilong PNG long salim tok sori i go long famili bilong leit Mista Kamma na pipel bilong Bogenvil.

"Leit Steven Kamma i bin sevim pipel bilong PNG wantaim gutpela pasin olsem lida.

"Osem Memba bilong Saut Bogenvil na Minista bilong Bogenvil Afes, leit Mista Kamma i bin wok hat tru long bringim bel isi na gutpela sindaun long laip bilong ol manmeri bilong ilektoret bilong em na long Bogenvil ailan.

"Mi bai hat long lus tingting long stretpela pasin bilong em na gutpela wok em i save mekim long kisim bel isi i go long Bogenvil bihain long trabel i bin kamap," Mista O'Neill i tok.

Em i tok Gavman bilong PNG i salim tok sori i go long famili na pipel bilong Bogenvil long dispela taim.

# Nupela pawa trensmisen lain i op

Charpetson Koi  
i raitim

PNG Power Limitet (PPL), PNG Hydro Developmen Limitet na ol papagraun i opim nupela Edevu Moitaka 132 kiloVolt Dabol Seket trensmisen lain projek long Ruburogo viles, Sentral Provins las wick Fraide.

Dispela trensmisen lain projek bai transpotim 50 Mega Wats (MW) pawa long nupela Edevu Hydro plent, na bihain 80 MW long Apa Naoro Brown Hydro Pawa plent i

go long Moitaka na Gerehu sab stesen.

Dairekta bilong PPL Stretejik Developmen na Bisnis, Chris Bais, i tok dispela trensmisen i narapela kain bikos em bai konektim Edevu na Naoro Brown Pawa plent.

Mista Bais i tok, "Taim dispela wok i pinis bai em i givim bikpela helpim long dispela ilektoret, Galp na NCD tu."

Em i tok dispela i sapotim gavman long bungim 2030 plen long givim elektrisiti o pawa long 70 pesen bilong popule-

sen long kantri.

Long wankain taim, man i makim maus bilong ol pipel, Kaunsela Tony Newton, i askim ol papagraun long Edevu i go long Koiari long sapotim dispela konstraksen bilong trensmisen long wanem em bai helpim ol pikinini long bihain.

"Yumi lukluk long ol gutpela samting na i no ol nogut sait bihain em," Kaunsila Newton i tok.

Memba bilong Kairuku Hiri, Peter Isoaimo husat i bin stap long dispela ser-

emoni i tok, "Gavman bilong PNG i stap bihain long dispela projek long sapotim ol developna PPL long rausim hevi bilong pawa sot bilong wapela pawa stesin long Sirinumu Dam."

Konstraksen bilong Edevu Hydro Dam bai i stat taim olgeta wokman i kam bek long holide bilong ol. Menesing Dairekta bilong PNG Hydro, Allan Guo, i mekim dispela toktok taim em i kisim ol jenelis i raun lukim hap we Edevu Hydro Dam bai i kamap long en.

## Ol komyuniti inap ranim MDG Projek

OL komyuniti inap long ranim developmen wok bilong ol yet long kamapim ol mak we Milenium Developmen Gol i tok long en.

Las fainel woksop bilong Milenium Developmen Gol (MDG) Ekseleresen Projek i bin kamap Ing las wik Fraide long Pot Mosbi.

Wantaim helpim bilong Yuropien Yunien (EU) we Dipatmen bilong Nesnel Plening na Monitaring i go pas long en inap long 4-pela yia. Projek i bin kamap bilong helpim Gavman bilong Papua Niugini long hariap kamapim ol mak bilong MDG long lokal level na long soim ol save na strong bilong ol komyuniti na ol sivel sosaiti grup long ranim wok developmen ol yet.

Projek i bin kisim mani gren mak bilong €150,000 (Yuro) i go long 4-pela rurel viles aninit long sivel sosaii

ogenaisesen long sapotim komyuniti sastenebol developmen. Dispela kain rot bilong projek i biringim olgeta lain long wok bung wantaim long kamapim ol kain developmen olsem jenda, yut, gavanens na en-vairomen.

Sampela wok kamap em i olsem: moa long 3,000 pipel bai kamapim ol mani bilong ol yet long ol projek olsem kasava o tapiok fid mil, prosesing plen bilong kakaruk, ples bilong kamapim ol pik, kopra draia na rais mil; 2,000 pipel bai gat moa kaikai na mani wantaim gutpela egrikalsa teknoloji; moa long 10,000 pipel nau inap long kisim gutpela helt ke long ol haus marasin; moa long 100 yangpela meri bai stap gut long skul bikos nau i gat gutpela ablusen blok (toilet) bilong ol meri sumatin; bai 850 pipel i gat moa sans long go long ol lokal maket bikos long gutpela transpot i stap; ol komyuniti i kamapim moa projek fan long ol lokal gavman, komyuniti kontribusen, lokal stekholda fanresing bilong K780,000.

Sampela moa gutpela samting i kamap em long gutpela wok bung i kamap namel long ol komyuniti, lotu grup na ol klen, bikos olgeta i luksave long wapela as tingting tasol bilong developmen; gutpela rot i stap bilong trening na skil developmen bilong ol yut; Strongim ol meri long ranim wok bilong projek na long givim ol trening; Moa wok bung na patnasip i kamap namel long ol lokal stekholda na komyuniti i gat bilip long lukim planti moa bikpela samting i

kamap.

Laspela woksop i bin gat presentesen bilong ol risal ol wok kamp bilong ol projek we ol lida bilong 4-pela pailot projek sait lida i givim. Ol lain i stap long woksop i bin toktok long wanem ol samting ol i bin lainim insait long dispela taim bilong pailot projek.

Ol i toktok strong long luk-save bilong komyuniti i mas ranim wok bilong ol yet. Ol i tok ol i redi long sapotim nupela Sastenebol Developmen Gol ajenda.

"Mipela i kirap no gut long wanem samting i kamap long ol 4-pela viles i kamap wantaim. Ol i kamapim wapela kain standet i antap tumas in-sait long kantri, long ol narapela long bihainim. Wapela samting mipela i lainim insait long dispela projek em olsem wan wan komyuniti i wok long go het na mipela i ken lukim long wanem hap yupela i bin stat long en na wanem hap yupela i kam inap long en nau.

Na mipela ken pilim olsem yupela tu i gat amas long yupela yet. Olgeta dispela wok em i bilong helpim ol komyuniti long go moa long lukim developmen bilong ol yet.

Wok bilong mipela olsem UN em long helpim yupela long kamapim dispela kain mak.

Yupela i soim ol samting yupela i bin kamapim. Tasol mipela save tu long wanem kain hatwok wantaim pen na aiwara yupela i bin putim i go insait long kamap long dispela kain mak," Roy Trivedy, UN Residen Kodineta na bos bi-long UNDP long kantri i tok.

## Asaro Helt Senta kisim nupela haus sik

ASARO Helt Senta, insait long Daulo Distrik bilong Isten Hailans provins em i wapela i kisim gutpela senis wantaim helpim bilong Korea Intenesen Koporesen Ejensi (KOICA), na Menesmen Kon-salten MEDIPACE.

MEDIPACE, wapela Helt Ke NGO bilong Korea i bin go pas long dispela projek olsem ol projek menesmen konsalten stat long las yia i kam inap long dispela mun taim wok i pinis.

Long de 18 na 19 Februari taim ol helt atoriti bilong Isten Hailans i go wokim laspela inspeksen bi-long bilong ol haus tasol nau yet ol medikal ikwipmen i no bin stap insait bikos rot i bruk long hailans haiwe i pasim rot bilong ol ikwipmen long kam long Lae.

Taim bilong ren na bikpela wara tait i bin brukim bris long hailans haiwe olsem na ol ikwipmen i no kamap. Tasol Fil Projek Menesa bilong



Piksa bilong nupela Asaro helt senta.

MEDIPACE, Dokta Ham, Youngsun taim ol ikwipmen i kamap na ol i putim i go insait long helt senta, dispela taim bai ol i redim long laspela inspeksen na bai haus i op long ol helt woka i mekim wok.

Dispela helt senta em i narapela bilong tupela projek we KOICA i putim mani long en, na MEDIPACE i go pas long menesim. Narapela em i Kwikila helt senta long Rigo Distrik, Sentral Provins we Praim Minista Peter O'Neill yet i bin opim long las yia.

KOICA i putim mani long mak bilong US\$5.5 milien long ki-



# Nupela provins i wok long senis

**NUPELA** Provins Hela i wok long senis isi isi, tasol sampela manmeri i no luksave gut long dispela ol senis na ol i tingting long bagarapim nem bilong provins bi-long yumi.

Nupela Administreta bilong Hela Provins, William Bando, i tok lidasip bilong Gavana Agiru na hat wok bilong provinsal administresen i wok long lukim provins i senis.

Dispela senis i lukim Tari, Komo, Koroba Margarima, Kopiago na Pori i senis gut tru insait long 4-pela yia tasol.

Taim Hela i no bin kisim provins, planti samting i no bin stap gut. Tasol namba wan Gavana bilong Hela, Anderson Agiru na namba wan administreta bilong Hela, William Bando, i bungim tingting na putim ol namba wan samting we pipel bai nidim long mekim laip i kamap isi.

Benk, pawa saplai, gutpela rot, gutpela haus sik, na pabik sevan wok manmeri i no bin stap long Hela. Tasol tupela lida i kisim ol dispela sevis i go long kirapim nupela provins na kamapim gutpela sindaun long Hela.

Yumi lukluk long ol arapela gutpela sevis Gavana Agiru na Administreta Bando i wokbung wantaim ol 3-pela open memba bilong Hela long bringim ol dispela sevis i kam insait long kirapim Hela provins.

## Pablik Sevis

Taim Hela i kisim provins, Tari i kamap hetkwata bilong Hela. Provinsal administresen i kisim ol wok manmeri long wok long Hela provins na kirapim dispela nupela provins.

Tasol sampela wok manmeri bi-long provinsal gavman i no save bihainim lo na mekim wok long provins. Taim planti wokmeri i wok i stap, ol wanwan manmeri tasol i save lusim wok na ol i save stap nating long Pot Mosbi na stilim mani bilong gavman.

Mista Bando i givim pinis tok lukaut long ol wok manmeri i no ken hambak na stap nating.

"Dispela kain ol manmeri long hambak na stap nating nabaut i no ken wok long Hela provinsal administresen. Ol i mas lusim wok na go mekim wok long sampela hap," Mista Bando i tok.

Mista Bando i tok em i rausim sampela les manmeri long gavman peirol na i no long taim, planti manmeri bai lusim wok bikos provinsal administresen bai no inap isi long ol.

"Ol les manmeri i no gat ples long Hela. Ol i mas go. Ol i no ken blokim na pasim provins long kamapim gutpela ol samting," Mista Bando i tok.

Em i tok planti wok manmeri i save mekim wok na stap long ples wantaim ol pipel tasol wan wan manmeri tasol i no save wok na



Hela Provinsal Administreta William Bando (lephan) i redi long bungim Praim Minista Peter O'Neill long Tari ples balus.

provinsal gavman bai no inap long mari mari long dispela kain ol les manmeri husat i save stilim mani bilong gavman.

## Lo na oda

Gavana Agiru i bin amamas na apim nem bilong nupela ekting Tari polis stesin komanda, Daniel Yangen. Mista Yangen i bin rausim moa long 50 polis manmeri husat bin mekim planti paul samting na husat i bin brukim lo taim ol i bin mekim polis wok long Hela Provins.

Mista Agiru i bin tok Hela i no nidim ol polis manmeri husat i save brukim lo na mekim nabaut.

"Mi laikim ol gutpela polis manmeri tasol long go wok long Hela. Ol polis manmeri manmeri long Hela i mas bihainim lo na mekim stretpela wok," Mista Agiru i tok.

Mista Bando i tok hevi bilong lo na oda long Hela ba go daun taim Hawa haus kalabus i op gen.

"Hawa haus kalabus bai op klostu taim tasol. Provinsal gavman i wok bung wantaim CIS long kirapim gen Hawa haus kalabus."

"Ol kontrakta i putim pinis pawa lain na mekim ol wok mentenens long larim ol woda man i kam na opim gen haus kalabus."

Hawa haus kalabus bai daunim ol hevi bilong lo na oda taim ol woda i kalabusim ol manmeri husat i save mekim trabel, brukim lo na kamapim birua long laip bi-long manmeri.

Komanding Opisa bilong Hawa haus kalabus, Suprintenden Jim Kamin i tok ol arapela samting bi-long Hawa haus kalabus i stap gut tasol wara saplai, banis waia na opim gen haus kalabus i no stap.

"Dispela i stopim mipela long opim haus kalabus na larim ol kalabus manmeri i kam stap insait long banis," Mista Kamin i tok.

Em i tok Hawa i gat 5-pela woda man i stap. Ol i lukautim ol samting bilong haus kalabus na stap long Hawa long helpim Hela Provinsal Gavman i kirapim gen

dispela haus kalabus.

"Mipela i stap long Tari wantaim ol pipel na ol komyuniti long sapotim ol wok long kirapim gen dispela haus kalabus.

"Mi laikim Hela mas gat haus kalabus bilong em yet bikos Hela em i nupela provins na haus kalabus i ken daunim ol asua bilong lo na oda," Mista Kamin i tok.

Em i tok kampani AM Holdings i mekim pinis ol mentenens wok long kirapim gen haus kalabus.

## Rot na bris

Planti ol rot insait long Hela i wok long kamap gutpela. Curtain Bros i wok long putim kolta long ol rot na kirapim planti nupela rot long Hela. Tari taun i no save gat gutpela rot tasol nau i gat ol nupela kolta rot.

Dispela em i bikpela senis tru. Pastaim Tari i save gat liklik karanas rot tasol nau sais bilong ol rot i go bikpela na kolta i kamap.

Praim Minista Peter O'Neill i tok promis long givim K600 milien long kirapim rot projek long Halimbu i go inap Kopiago. Sapos ol kontrekti i yusim gut dispela mani na mekim wok, Koroba seksten bi-long Hailans Haiwe bai kirap na dispela bai bringim moa sevis i go insait long Hela.

Ol liklik han rot insait long Tari taun i wok long kisim kolta na rot i stap gut stret. Rot em i namba wan sevis we em bai kisim i kam insait arapela sevis i kam. Sapos rot i no stap gut, sampela ol sevis bai no inap stap gut.

Tasol Hela provinsal gavman i mekim gutpela wok long rot. Ol sampela bikpela rot projek provinsal gavman i mekim em ol; Komo Lup rot, Hulia-Komo rot, Hom-Paua-Tari rot, Tari-Ambua rot siling projek, Koroba taun rot siling projek, na Kopiago haiwe rot projek, Komo-Nogoli rot siling projek na arapela rot siling projek.

Hela provisal gavman i putim wanpela bikpela bris ol i kolim 'Pe-hala Togo'long Wara Tagali.

gutpela sevis long provins na pipel. Tasol mani mak long baim balus tiket em i bikpela mani tru.

## Skul

Ol skul long provins i wok long kisim sapot long provinsal gavman. Dauli Tisas Kolis em i wanpela biknem skul i stap lon Hela.

Tari, Margarima na Koroba i kamap sekendari skul na provinsal gavman i wok long helpim o dispela skul. Tasol Tari sekendari i tok ol i no gat planti spes long kisim moa sumatin.

Dispela em i wanpela salens bi-long provinsal gavman long ske-lim. Hoiebia Hai Skul i wok long helpim gut ol yangpela skul pikinini na dispela i soim olsem edukesen sekta i wok long senis long Hela.

Fri edukesen polisi bilong gavman i mekim planti yangpela manmeri long skul na ol i go insait long klasrum long kisim moa save.

## Haus sik

Hela Provinsal Haus Sik i wok long kirap. Menesing Dairekta bi-long Oil Search Limited, Peter Bot-tan, i kamap nupela bod siaman bilong haus sik. Sif Eksekutiv Opisa (CEO) Dokta Hewali Hamiya i mekim gutpela wok tru long larim ol pipel i kisim gutpela medikel ke na helt sevis.

Dispela em i tru bikos Nesenel Dipatmen ov Helt i luksave olsem Tari haus sik na Buka haus sik i bin mekim gutpela wok na givim gut helt na medikel sevis long ol pipel.

Level bilong Tari haus sik i nau go antap long provinsal haus sik. Pastaim em i save stap olsem dis-trik haus sik taso nau em i kamap bikpela riferal haus sik bilong Hela Provins.

## Egrikalsa bisnis

Planti sans bilong kirapim bisnis i wok long kamap. Ol dispela sevis provinsal gavman i givim long pipel i kirapim moa sans long mekim bisnis. Ol manmeri i ken yusim dispela ol sevis na mekim bisnis long Hela.

Tasol Gavana Agiru i laikim ol manmeri long planim kaikai na mekim egrikalsa bisnis. em i tok Hela i oil na ges tasol wanpela de, dispela oil na ges bai pinis.

Mista Agiru i tok gaden kaikai wantaim ol enimal olsem kakaruk, kau na pik em ol gutpela samting we ol manmeri i ken mekim bisnis wantaim.

Mista Agiru i kisim i kam insait El Al Group bilong Israel long helpim ol manmeri Hela long planim kaikai na lukautim pik na kakaruk. Dispela program em i karim gutpela kaikai bikos em i daunim prais bilong gutpela kaikai na ol manmeri i kisim save long mekim gaden na planim kaikai.

# Malabag opim nupela klasrum long Tokarara



Minista Malabag wantaim ol Bod Memba bilong Sen John Aposel Katolik Skul na het tisa bilong skul i sanap long veranda bilong klasrum antap biahain long em i opim dabol klasrum. Poto: Nicky Bernard.

Frieda Sila Kana  
i raitim

**Michael Malabag, Memba bilong Pot Mosbi Notwes na Minista bilong Helt, HIV na AIDS i amamas long opim nupela dabol klasrum long Sen John Aposel, Katolik Praimeri Skul long Tokarara, Nesenel Kepital Distrik.**

Minista Malabag i putim K800,000 long wokim wanpela haus wantaim 4-pela klasrum long las fainensel yia na em yet i bin opim long Tunde, dispela wok.

Long taim bilong opim klasrum, Mista Malabag i tok, em i mekim planti gutpela wok insait long ilektoret bilong em long Mosbi Notwes, tasol em i no save paitim bros na apim nem bilong em yet long midia, olsem sampela i save mekim.

"Mi bin gat sampela hevi long helt bilong mi tasol nau em ol i save painimaut pinis long sik bilong mi na mi stap long marasin. Nau strong bilong olpela Michael Malabag bilong Yunien i kam paia bek. Fraide bai mipela opim narapela dabol klasrum blok long June Veli.

Mipela gat hanmak long Gerehu Sekendri, Waigani Praimeri Skul na moa. Mi save kisim kain kain tok bilas i kam tasol mi save kisim wantaim gutpela bel na daunim tasol," Mista Malabag i tok.

Em i tok tenkyu long Asbisop John Ribat long blesim klasrum na tu



Ol sumatin na ol tisa wantaim ol papamama i soim amamas na tenkyu bilong ol long Mista Malabag na ol i kapsaitim ol presen antap long en. Wan wan rijon bilong Papua Niugini i givim ol presen long Minista. Poto: Nicky Bernard

long ol pikinini long ol i kisim em long get na bringim em i go long podium.

Mista Malabag i tok Nesenel Kepital Distrik i bin givim K200,000 long stretim ol plawa na lukluk bilong ausait long klasrum.

Em i tok klasrum i kam wantaim 80 de, 20 long wanpela klasrum, na 4-pela opis dis na sia bilong ol tisa bilong gret 7 na gret 8.

Mista Malabag i tok em i putim long baset wanpela K200,000 moa long Gerehu Sen Pauls em narapela katolik

skul, tasol mani pinis na em i wet long kisim gen na biahain bai givim long wokim klasrum olsem dispela.

"Mipela i putim mani long wanem hap mipela i tok long putim long en. Mipela i wokim long trupela samting, i no long wantaim ol pipia samting we bai bagarap hariap long wanpela yia.

Mipela wokim strongpela haus we bai stap long planti yia biahain," Mista Malabag i tok.

Em i tok, em i putim pinis K1milien long

stretim Hagara Praimeri skul, narapela K1milien long Philip Aravure na em i redi long opim gen narapela wankain dabol klasrum long June Veli Praimeri Skul long tumora Fraide 26 Februari.

"Mipela i no stap natting. Mipela i tromoi mani long mekim samting. Ol pikinini yupela i mas amamas long wanem samting memba bilong yupela i givim na lukautim gut long em bai stap long-pela taim biahain long ol yia i kam," Mista Malabag i tok.


**Nambawan Super**  
**INVESTMENT TOKTOK**  
*with DR. STEPHEN NASH*

Wanem kain we bai globol go?? (Growth) i bagarapim kaikai bilong globol invesmen

Sapos yu gat sampela askim, plis salim i kam long [toktoksuper@nambawansuper.com.pg](mailto:toktoksuper@nambawansuper.com.pg) na mipela bai bekim.

Taim wanpela man o meri i putim wanpela invesmen, em i no min olsem em bai kisim propit olgeta taim, no gat. Sampela taim bai no gat mani i kam bek. Tasol invesmen em i tasik tasol long soim ikonomi bilong ol i stap olsem wanem. Strongpela invesmen i save kamapim gutpela mak bilong propit i kam bek na slek ikonomik bai i no inap long kamapim propit. Nau long dispela taim em globol ikonomi em i slek na i no gat strong. Nau long dispela taim, ikonomi bilong wol em i slek, na hia em ol sampela kain samting we i save soim olsem globol ikonomi em i no gat strong:

- Ol prais bilong ol komoditi long wol i pundaun, we i soim olsem i no gat bikpela laik long baim dispela komoditi insait long wol,
- Mak bilong ol prais long salim samting i go daun long Yurop na Siapan
- 10-pela yia gavman bon mani long Siapan i no kamap gut, na sampela hap bilong win mani em ol i slek liklik long biahain laik bilong of gavman bon bilong Yurop.
- Ikonomi bilong planti kantri i no gro strong, we em i kamap ples klia insait long mali-ya se prais i pundaun long planti ol bikpela benk na planti bikpela risos kampani.
- Planti kampani i no mekim gut mani, olsem na ol credit reit bilong ol i go daun, na em i minim olsem sas o intres bilong ol dinau mani ol i kisim i go antap.
- Ol investa na ol benk i no laik givim dinau mani long ol risos kampani, na ol arapela kampani tu.

Dispela lista i soim tasol ol samting we planti lain i save pinis Ing en; olsem ikonomi long wol nau em i no strong. Em i minim olsem olsem namel long ol arapela samting, we i save kam bek long ol invesmen em bai stap slek yet long sotpela taim. Dispela kain taim em i taim bilong asset alokesen, namel long ol asset we inap long painim bagarap hariap na ol asset we i no inap painim bagarap hariap. Em i bikpela samting, olsem Piksa 1 i soim. Taim ikonomi em i strong, ol asset we i isi long kisim bagarap i save mekim gut, na taim ikonomi i no strong tumas of asset i no save kamapim gut mani, o ol i save kamapim liklik mani tasol.

Ol ikwiti, o se em ol asset we inap long kisim bagarap isi, wantaim bikpela propit long bekim dispela kain we bilong kisim bagarap isi, tasol ol gavman bon na kes, namel long ol narapela samting, em ol i no stap long mak bilong bagarap isi, na ol i save kamapim liklik mani tasol.




Figure 1: Source, NSL

nsait long Piksa 1, wanpela asset we i no isi long kisim bagarap, em i wanpela we i gat bilip long em inap stap strong, winim wanpela asset we inap long bagarap isi, kain asset olsem ol ikwiti. Long kain taim olsem nau, kes mani em i mekim bikela wok, long karamapim bagarap we ol asset i save isi long kisim bagarap i kamapim, kain olsem ol ikwiti.

Bikpela toktok, em olsem ol asset alokesen inap long senism Lukluk bilong yu long bagarap o gutpela samting we bai kamap long invesmen.

Long taim we ikonomi envaironment i no strong tumas, planti investa i save laik inves long ol asset we i no inap long kisim bagarap isi.

Moa long long Piksa 2 daunbilo, wanpela portfolio we i isi liklik, portfolio B, em i resis wantaim narapela i strong liklik olsem portfolio A. ol bagarap na gutpela samting bai kamap long dispela invesmen em i wankain tasol long tupela portfolio, na dispela statistik em ol i bin kisim long ol ripot bilong mun long PNG nsait long 10-pela yia.

Bikpela samting em olsem taim mak bilong invesmen i go long ol asset we isi long kisim bagarap i go daun, em i save daunim mak bilong bagarap long invesmen insait long wanpela yia, o long hamas propit mani bai kamap bai senis long namel mak, wantiam bikpela moa pesen olsem 5.27 pesen. Na dispela gutpela samting i save kam wantaim bikpela prais long peim; mani propit bai i liklik; long mak bilong 3.90 pesen i go daun long enuel propit.

Portfolio 'B' i kamapim liklik bagarap tasol bikos em i gat liklik ikwiti, i no gat bikpela propeti, wankain hevi bilong bon na planti moa kes mani, taim skelim wantaim portfolio 'A'.

Portfolio Allocation	Less Risky		
	A	B	Asset Allocation
Cash	25%	60%	2.77% 9.34%
Bond	25%	25%	9.99% 8.92%
Property	25%	10%	15.42% 13.05%
Equity	25%	5%	12.77% 17.18%
Total	100%	100%	10.24% 9.87%
Difference in return (portfolio A - portfolio B) BENI			3.90%
Difference in risk (portfolio A - portfolio B)			5.27%

Source: NSL, BPNG, KFM

Figure 2: Source, NSL

Long pasim toktok, lukluk long slek globol ikonomik taim we nau yumi stap long en, em ol mani i kamap long ol invesmen bai liklik tasol, i no olsem bipo. Tasol sapos ol komoditi prais i tanim bek i go antap, na sapos gro bilong globol ikonomi i stap long wanpela hap tasol na i kamap gut isi, isi, em nau ol invesmen bai kamapim gutpela na bikpela moa propit. Bilong yumi long kisim ol dispela gutpela propit i kam ben, yumi mas stap long invesmen, bikos em i save hatwok tru long save tru wanem taim bai ol invesmen i kamapim bikpela propit. Olsem na em i gutpela long tok olsem yumi mas amemas long taim no gut bilong ikonomi we i no gat bikpela propit i kam ben, long sotpela taim na bai yumi inap long kisim gutpela samting biahain sapos invesmen i kamap gut long namel taim.


**Nambawan Super**  
**Long kamap Nambawan pren bilong yu na famili; halivim, strongim na lukautim moni gaden bilong yu nau na biahain.**

**BIGGER, BETTER, SAFER,  
STRONGER AND STILL NUMBER 1**

# Ol i holim tupela polis na sasim ol

**TUPELA** manmeri long Polis Dipatmen i kisim sas long tupela i mekim sampa polis pasin bihain long ol polis husat i save mekim wok painim aut long raskol pasin i holim ol na sasim long Febueri 16 long Lorengau, Manus.

Rhoda Kerea i gat 27 krismas na i bi-long Ailan, Abau, Sentrel Provins, na Christopher Chapau i gat 30 krimas na i bi-long Pondelis viles

long Lorengau. Tupela i kam sanap long kot na ol i lusim ol aninit long kot beil.

Ekting Asisten Komisina i save stap pas long ol stil pasin, Victor Isouve, i tok, tupela manmeri i mekim ovataim klem mak long K15, 000 taim ol lain i gat pawa long dipatmen i no tok orait.

Isouve i tok, tupela marit i lusim ples bi-long wok, Polis Hetk-wata, na i stap long

Manus na ol i holim tupela na sasim ol.

Kerea i yusim posisin bilong em olsem Tim Lida bi-long Perol Odit Seksen na putim nem bilong man bilong em long ovataim klem na dispela klem i go long Alesco Peirol Sistem na ol i prosesim long Fainens Dipatmen.

Chapau i brukim lo taim em i wok olsem komputa teknisien wantaim Polis Dipatmen.

Tupela i sanap long Lorengau kot long Febueri 17 na baim K3000 beil mani na ol i rausim tupela long sel.

"Ol polis prosikuta i stretim pepa bilong dispela kes na skruim i go long Pot Mosbi," Isouve i tok.

"Ol i bin kamapim wanpela spesol Task Fos long mekim wok painim aut long ol dispela kain klem."

"Sampela moa wankain klem em ol bai painim aut na holim ol."

POLIS i bin holim pasim Ektong Is Sepik Provins Edministreta, Elizabeth Kaprangi, na Menesing Dairekta bilong Wewak Bilding Kontrektta, Stephen James Taylor, bihain long ol i painimaut olsem ol mani ol i givim long kamapim gen Moem Bareks bilong Papua Niugini Difens Fos (PNGDF) long 2013 i no bin go stret.

Is Sepik polis i holim tupela long 15 Febueri, 2016.

Polis i tokaut olsem mani mak long K803, 866 bilong kamapim Moem Bareks bilong PNGDF em ol i yusim long nupela projek long Is Sepik Provinsal Polis Hetk-wata Bilding.

Polis i bin askim Kaprangi

na ol i sasim em long wan-pela sas long misapro-priesen o yusim mani long narapela wok aninit long sekseen 383 A (1) bilong Kriminal Kod Ekt na wan-pela sas long em i bin brukim lo bilong Opis aninit long sekseen 92 (1).

Ol i bin holim pasim James Taylor long Febueri 13 na sasim em long wan-pela sas long em i yusim mani long narapela wok aninit long sekseen 383 A (1) bilong Kriminel Kod Ekt na wan-pela sas long pinisim mani.

Wewak polis i tokaut olsem ol i baim mani inap long Wewak Bilding Kontrektta long mekim wok tasol wok i no stat.

Wewak Polis i tok dispela mani em ol i baim long hap mani bilong K2 milien we ol i bin givim long 2RPIR, Moem Bareks, long 2013 na ol i bin putim dispela mani long Is Sepik Provinsal Gavman Treseri Opereting Akaun.

Ol i bin mekim wok painimaut long dispela mani na ol i holim tupela.

Ol i mekim wok painimaut yet na ol narapela husat i stap wantaim na yusim dispela mani em ol bai holim ol tu, klostu taim.

Kaprangi na Taylor i beil na kam aut long han bilong polis na tupela bai sanap long kot bihain.

"Olgeta taim midia i ripot olsem piksa bilong polis i no stret long ai bilong pablik na long dispela ast-ingting, IAD em namba wan rot long lukluk long dispela kain pasin." Disiplin insait long konstabuleri i no kamap orait bikos ol memba bilong konstabuleri i no bi-hanim ol liklik lo na oda.

"Dispela kain liklik oda bai karim kaikai taim ol lain i gat save bai go insait long fos na bihainim ol dispela oda."

konstabuleri husat i brukim lo bai bungim disiplineri eksen o kriminel prosekusen aninit long kot ov lo.

Dispela plen i kamap orait na IAD bai givim aut notis long ol memba bilong konstabuleri long putim ol stretpela yunifom.

Dairekta bilong IAD Sif Su-paintenden, Robert Ali, i tok, "Planti Polis man na Polismeri i no bihainim lo bilong bilas bilong konstabuleri na dispela i soim rabis piksa bilong konstabuleri."

IAD i lukluk na ol memba bilong konstabuleri husat i brukim dispela kain lo em ol bai sasim ol aninit long lo bilong edministretsen.

IAD i hariap long mekim wok painimaut long ol toktok egensim polis na ol lain husat i bagrapim nem bilong konstabuleri em ol bai sasim ol aninit long Konstabuleri Stending Oda (CSO).

Aninit long dispela kain wok painim aut, sapos ol memba bilong

## NCD Polis i holim pasim wanpela Eks-Polis Sajen na sasim em

NESENEL Kapitel Distrik Polis i holim eks-polis sajent, Philip Pokop, na sasim em long Februari 19 wantaim tripela sas long traim long kilim man, brukim lo na em i bringim pret long narapela lain.

Pokop i tok no gat long baim beil na ol lain husat i mekim wok painimaut long dispela

kes i painimaut wanpela Glok Pistol em i holim long dispela taim.

Ekting Asisten Komisina bilong Kraim, Victor Isouve i tok, "Long strongim toksave bilong Komisina Gari Baki olsem 2016 em i yia bi-long disiplin, konstabuleri wok strong long mekim wok painimaut long ol klem ol i mekim

Iouve i tok, eks-sajet i stap long kalabus na em bai kam ausait sapos em i winim kot.

"Ol bai mekim wankain wok painimaut long narapela memba bilong polis, sapos ol i brukim lo olsem," Isouve i tok.

Isouve i tokim ol memba bilong konstabuleri long mekim wok long stretpela rot.



Polis Komisina Gari Baki i tokim ol wokman bi-long em olsem 2016 em yia bi-long disiplin. Ol memba bilong polis husat i no bihainim lo bi-long polis bai no gat spes insait long polis dipatmen.

**INTANEL AFEAS DAIRKTORET I TOKAUT LONG PAIT EGENSIM KORAPSEN**

INTANEL Afeas Dairektoret bilong Polis (PIA) i tokaut long pait egensim ol polis husat i no gat disiplin na i gat pasin korapsen.

IAD i kamapim dispela rot long senisim nem na kala bilong Konstabuleri bihain long komisina Gari Baki i tokaut olsem 2016 em i yia bilong disiplin.

Aninit long dispela rot, IAD bai holim ol memba bilong konstabuleri, sapos ol i holim pasim sampa polis saspek insait long 24 aua

wantaim ol sas i no kamap long stretpela rot.

Aninit long Jeneva Konvensen bilong Human Raits, ol saspek travelman i ken stap insait long sel inap long 24 aua, tasol lo tambu long ol lainb husat i no mekim travel.

Sapos wanpela lain in no brukim lo na ol i sasim ol mak inap long dispela taim em ol i mas rausim ol long sel.

Dispela em i wanpela toktok we

IAD i lukluk na ol memba bilong konstabuleri husat i brukim dispela kain lo em ol bai sasim ol aninit long lo bilong edministretsen.

IAD i hariap long mekim wok painimaut long ol toktok egensim polis na ol lain husat i bagrapim nem bilong konstabuleri em ol bai sasim ol aninit long Konstabuleri Stending Oda (CSO).

Aninit long dispela kain wok painim aut, sapos ol memba bilong

konstabuleri husat i brukim lo bai bungim disiplineri eksen o kriminel prosekusen aninit long kot ov lo.

Dispela plen i kamap orait na IAD bai givim aut notis long ol memba bilong konstabuleri long putim ol stretpela yunifom.

Dairekta bilong IAD Sif Su-paintenden, Robert Ali, i tok, "Planti Polis man na Polismeri i no bihainim lo bilong bilas bilong konstabuleri na dispela i soim rabis piksa bilong konstabuleri."

**STAT LONG MANDE 01 FEBRUERI, WANTOK NIUSPEPA OPIS I STAP NAU LONG ANGAU DRAIV, BOROKO.**

**MIPELA I LUSIM ABLE COMPUTING HAUS LONG SENTRAL WAIGANI, LONG FONDE 28 JANUERI NA I GO LONG DOVE TRAVEL SEVIS HAUS LONG SEKSEN 24, LOT 25, ANGAU DRAIV (KONA BILONG LAHARA AVENUE), BOROKO.**

Opis fon namba (325 2500) na fex namba (325 2579) bai stap wankain yet tasol ol email adres bilong olgeta wokman na meri bai senis. Pastaim email adres i pinis wantaim dispela mak, @wantok.com.pg, tasol nau em bai pinis wantaim @wantokniuspepa.com.

**TOKSAVE: Opis fon lain i open nau!**  
Yu ken ringim mipela nau long (675) 325 2500

Ol mobail namba long ringim mipela long bisnis em:

- 73329467 - Elizabeth Konga Jeneral Menesa
- 76210007 - Lesley Bentz Edvetaising na Sels Menesa
- 72739408 - Veronica Hatutasi - Edita
- 73650795 - Edvetaising

Toksave i kam long Jeneral Menesa, Elizabeth Konga.

**Word Publishing Company**

# Sogeri Nesenel Hai Skul i gat nupela klasrum blok



**Sir Ronald Tovue, wapela bilong ol sumatin bilong bipo long 1956 na wapela dairekta bilong Treid Pasifik, kampani we i wokim ol dispela klasrum kompleks il katim ribon long opim ol klasrum blok.**

Poto: Josiah Ururu Kana

## Frieda Sila Kana i raitim

**SOGERI** Nesenel Hai Skul, wapela olpela nesenel hai skul long kantri em i lukim narapela kain senis insait long 2015 na 2016 wantaim mani mak bilong K40 milien.

Dispela olpela nesenel hai skul nau i gat 16 ol nupela klasrum, wapela bikela oditorium, nupela laibreri, nupela haus tumbuna na tupela dabol stori domitori bilong ol gret 12 mangi na ol meri, na nupela edministresen blok.

Dispela senis em i go wantaim senis bilong pasin bilong ol tisa na sumatin tu. Dispela senis i kamap, bikos long hatwok bilong wapela prinsipel pastaim, Mista Benny Rayappan husat nau i stap olsem dairekta bilong olgeta nesenel hai skul long kantri.

Ol dispela bikpela senis long ol haus bilong skul

i bin kamap long mani alokesen i kam long Nesenel Dipatmen ov Edukesen long ol foapela nesenel hai skul long kantri, em Soger, Kerevan, Aiyura, Pasam na Pot Mosbi Nesenel Hai skul.

Olgeta mani em K40 milien we wan wan bilong ol dispela skul i kisim K10 milien. Mista Rayappan husat i bin stap long taim bilong opim ol dispela dabol klasrum na ol narapela fasiliti, i tok olsem, Sogeri Nesenel Hai Skul em i namba wan long yusim olgeta K10 milien bilong en long mekim wok bilong infrastraksa long skul. Na tu ol i givim bek akwital ripot bilong dispela mani pinis long las yia.

Pantreid, wapela han kampani bilong Treid Pasifik i bin wokim ol dispela klasrum blok. Mista Rayappan i tok, Pantreid i bin winim kontrak namel long 4-pela kampani we ol i

bin makim taim 15 kampani i bin aplai long tenda long yia 2011.

Em i tok long 2007 ol sumatin i bin kukim 8-pela klasrum na ol sumatin i no bin gat ol sosol saiens klasrum. Skul i bin askim edukesen dipatmen na ol i kisim K2 milien long statim ol wok bilong senism ol klasrum.

Long brukim K10 milien mani bilong Soger, K1.3 milien i bin go long wokim Sosel Saiens blok wataim 8-pela klasrum na 4-pela opis bilong ol tisa, K1.8 milien i go long Saiens blok wataim wankain namba bilong klasrum na opis, K1.8 milien i go long wokim nupela oditorium, K1.1 milien long kirapim nupela dabol stori edmin blok, K1.5 milien i go long kirapim haus slip o dom bilong ol sumatin meri wantaim 80 rum na wankain mani mak na stail haus tu long ol sumatin

mangi.

Ol dispela haus i sain moa na i kisim tru mak bilong wanpela ol sekenderi na nesenel hai skul we edukesen dipatmen i save givim tok orait long en.

Fes Asisten Seketeri bilong Edukesen, Provincial Sevis, Maxton Essy i bin opim ol dispela klasrum blok na oditorium wantaim laibreri na wapela haus tumbuna.

Em i tok olsem edukesen dipatmen i save lukluk long wanem kain standet bilong saiens blok ol skul i save gat, pastaim long ol i givim tok orait bilong ol i kisim mak bilong sekenderi o nesenel hai skul.

"Mipela i save lukluk long standet bilong saiens leboratori, pastaim long mipela givim tok orait long wanpela skul i kamap sekenderi o nesenel hai skul. Soger em i inapim stret dispela mak," Mista Essy i tok.

# Tuma laikim skul i mas stat hariap

## Mathew Yakai i raitim

**PLANTI** prameri skul insait long PNG i statim skul pinis na ol tisa i stap pinis long skul, tasol Enikuawai Praimeri Skul long Bundi LLG long Madang i no statim skul yet.

Kros i go i kam namel long ol tisa na papamama na ol skul bod ov menesmen na long hevi bilong fainens na edministresin olsem na ol sumatin i no go skul tripela wok nau.

Tuma Albert, husat i gat moa long 20 krismas na bai wokim gret 6 long Enikuawai prameri skul mekim strongpela askim i go long Katolik Asdaiosis long Madang long stretim hevi namel long ol tisa na papamama na ol sumatin i ken go bek long skul.

Tuma i tok olsem edukesen em bikpela samting long Bundi na em i askim ol papamama na ol tisa na skul bod na Katolik ejensi long bung na stretim toktok na skul i ken stat.

Albert em i no marit yet, tasol em bikpela sumatin namel long ol lain long klas bilong em. Long dispela yia em bai wokim gret.

Em i gat strongpela bilip tru long skul strong na go long bikpela koles o yunivesiti long bihain taim

"Mi bilong Bundi na mi luksave olsem tu-pela bikpela maining projek i stap long distrik bilong mi, em long Yandera maining na Ramu Nikel, tasol planti long mipela long dispela taim i no go long skul," Tuma i tok.

"Mi lukim ol lain long narapela hap i ranim main na mipela ol Bundi lain i wokim ol liklik wok tasol.

"Mi laik skul na kisim save kisim bikpela wok long maining na kamap

olsem papa tru blong projek insait long dis-trik bilong mi," Tuma i tok.

Tuma i laik pinisim gret 8 long Enikuawai prameri skul na go long Brahman Sekenderi na bihain em laik i go long yunivesiti.

"Maski mi pas o feil, mi bai strong yet na skul i go inap mi kamap long yunivesiti. Mi gat strongpela bilip long mi yet na krismas bilong mi tu bai no inap stopim mi," Tuma i tok.



**Tuma Albert i hangre long go bek long klasrum Tasol turangu klasrum bilong em i no gat sumatin na tisa** Poto: Mathew Yakai

## Sumatin lida amamas long nupela klasrum

### Frieda Sila Kana i raitim

**JUNIOR** Wusik, Vais Presiden bilong Studen Representativ Kaunsil (SRC) long Soger Nesenel Hai Skul i tok em i amamas tru long ol bikpela senis i kamap long gutpela bilong ol sumatin na ol tisa long skul gut.

Mista Wusik em i bilong Minj long Jiwaka Provins. Em i bin go insait long Soger long yia 2015 long wokim gret 11. Nau dispela yia em i stap long gret 12 na em i namba tu lida man bilong ol sumatin long dispela skul.

Dispela sumatin em i tok olsem gutpela fasiliti o ples bilong skul na tu gutpela domitori o haus slip bilong ol gret 12 mangi i mekim ol sumatin i laik wok hat moa long kisim wanem mak ol i tingim long laip bilong



**Junior Wusik, bilong Minj long Jiwaka em i SRC vais president bilong Soger Nesenel Hai Skul. Em i bilip long kamapim gen nupela nesen long bihain taim.** Poto: Josiah Ururu Kana

opim ol nupela klasrum blok na ol arapela edministresen bilding.

Makim maus bilong ol narapela sumatin, Junior Wusik i tok, ol klasrum blok i kam wantaim ol des na ol

ikwipmen bilong helpim skul bilong ol na dispela i mekim olgeta sumatin i amamas moa.

Ol i gat ol samting olsem ol teleskop long lukluk i go long skai na ol narapela samting bilong skul long saiens.

"Dispela skul em i bin karim dispela nesen i go long independens wantaim ol namba wan man husat i bin stat long dispela skul bipo. Na mipela nau i laik go pas long kamapim nupela PNG wantaim ol kain fasiliti we i stap long mak bilong wol," Wusik i tok.

"Long hia em olgeta sumatin i save bilip long pasin bilong harim tok na bihainim toktok bilong ol tisa na ol sumatin lida. Bikos mipela i bilip olsem mipela bai kamapim gen nupela nesen olsem na olgeta lain i mekim bisnis bilong ol long stadium," em i tok.



Nupela Saiens blok long lephan na nupela sosol saiens blok long raithan. Poto: Josiah Ururu Kana

# Oro Provins helpim YWAM Medikal sip

**ORO PROVINS** Gavana, Gary Juffa, i givim wan-pela sek mani long mak bilong K150,000 i go long YWAM Medikal Sips long makim Oro Provin-sal Gavmen, bihainim tok promise m i bin mekim long, 2015 long helpim enuel operesen bilong YWAM Trening na Medikal Sip, MV YWAM PNG.

Gavana Juffa i tok olsem provinsal edministresen i wanel tru long sapotim wok bilong YWAM long Oro Provin-s..

"YWAM i statim wok long Oro tripela yia i go pinis wantaim ol prameri helta tim bilong ol i wok long graun na kamapim wok poroman wantaim ol local helta wokman na meri na ol lida bilong ples long redim kamap bilong namba wan trening na medical sip long provins."

"Wanem samting i kam klia long mi long wok bi-long YWAM em long strongpela tingting ol i gat long wok wantaim ol pipel bilong mipela. Ol i statp insait long ol viles,



L-R Oro Gavana Gary Juffa i givim sek i go long Dairekta bilong MV YWAM Sips, Ken Mulligan. Long lephan em Sir Rabbie Namaliu, Petron bilong YWAM Sips long PNG na Mista Mike Reynolds, Petron bilong YWAM Medikal Sips long Australia.

wokabaut long bus rot wantaim ol roksak long baksait wantaim ol saplai marasin, ol i kalap long ol dingi i go long solwara bi-long mipela na ol kamap long laikim ol pipel bilong mipela. Ol helt woka na ol provinsal edministresen i laik lukim kain raun bi-long ol long olgeta yia. Dispela wok i no bilong mekim wok tasol, nogat,

em i kamapim ol pren tu. Ol pren we i gat wanel tingting long kamapim nambawan sevis deliveri long ples."

"Mipela i amamas long lukim MV YWAM PNG sip wantaim ol nupela klinik long en i wok longkam long mipela. Long 2015 namba wan raun bilong em, moa long 1,500 sik-manna meri i kisim

helpim. Na moa long 800 imunaisesen i kamap long ol ples i stap longwe tru tasol insait long 5-pela de tasol. Na ol i wok wantaim 15 helt woka long ol autris patrols. Mipela i gat gutpela wok tim.."

"Donesen bilong mipela nau i strongim wok poroman bilong mipela na tok tenkyu bi-long mipela long helpim

mipela i kisim long yia 2015. Mi amamas tu long bungim wantaim dispel 2016 fanding komitmen bilong K250,000," Gavana Juffa i tok.

YWAM Medikal Sips Menesing Dairektor, Ken Mulligan, i tok amamas long sapot bilong Oro Provin-sal edministresen.

"Mipela i gat bikpela tingting long ol pren mipela i gat long Oro Provin-s na mipela tok tenkyu long Gavana Juffa long em i go pas long kira-pim na strongim dispela rurel helt sevis program."

"Mi bilip em i wanel de bilong amamas long ol Papua Niugini pipel bikos taim yumi bung wantaim, yumi gat strong long helpim planti tausen laip," Mista Mulligan i tok

MV YWAM PNG i stap nau long Galp Provin-s long statim wok bilong prameri helta ke, optometri o stretim sik bi-long ai, dentistri o stretim na sekim ol tit, wokim ai operesen na trenim ol lokal komyuniti bilong kikori distrik.

## SMS teknoloji long kisim ol data ripot

DIPATMEN bilong Implementesen na Rurel Developmen (DIRD) nau bai yusim mobail fon SMS long salim ol toksave bi-long ol projek i go long ol distrik wantaim Rapidpro.

Rapidpro, we bilong bungim ol toksave na ripot em i fri long mobail na em bai helpim gavman long salim na kisim ol toktok bilong ol bikpela sevis i go long ol rurel komyuniti.

Rapidpro pailot trening long yisim SMS data koleksen tul em i bin kamap long las-wik Fraie long DIRD opis. Em bilong skulim ol Sif Eksekutiv opisa bilong ol Dis-trik Developmen Atoriti wantaim ol LLG na sektu menesa blong ol.

DIRD wantaim patnasip bilong UNICEF i wok long redi long yusim Rapaidpro; isi long yusim, na long monitorim SMS teknoloji long mobail fon we ol i save yusim long wol long bungim na stretim na tu long givim aut ol data o ripot haria-pna isi tasol.

Ol toksave we i kam insait long Rapid-pro bai helpim gavman dipatmen long Pot Mosbi long ol i ken kisim klia save long ol trupela piksa bilong ol wok i kamap long ol distrik na LLG level.

DIRD Deputi Seketeri Stephen Rambe i tok wanem samting ol i laikim baikamap long taim ol i go insait long Rapidpro projek em long ol bai gat gutpela distrik pro-fail, we ol bai yusim long mekim gutpela na trupela disisen, na long plening wantaim klia namba wantaim wanel bilong provinsal na nesenel gavman ejensi.

## Sastenebol Populesen Projek

**ANGAU Memoriel** Haus sik long Lae i kisim luksave long bikpela wok bilong helta kea bilong strongim ikonomik na sosol developmen long kantri.

Olsem na Australia gavman i amamas gen long givim mani mak bi-long K15 milien long baim ol nupela ikwipmen na sampela infrastraksa bilong haus sik.

Dispela mani bai bringim bikpela sapsela bilong karim raun; wan-

wokim mentenens na sampela moa infrastraksa long givim gutpela sevis, na long givim gutpela helta standet long ol pipel.

Ol ikwipmen na ol infrastraksa samting bai kamap long haus sik insait long ol mun i kam bihain, em ol medikal ikwipmen; wanel potabol wod na sejeri tieta o ikwipmen bilong wokim operesen we em i isi long karim raun; wan-

pela nupela dentis klinik; nupela wok bilong stretim ol wok; eksensen bi-long intensive ke yunit; wantaim ol bikpela sevis infrastraksa olsem wanel nupela sten bai jenereta na UPS bilong holim pawa long ol masin taim mein pawa i dai.

Sif Eksekutiv Opisa, Dokta Chris Kenyherc i tok tenkyu long Australia long givim dispela helpim we ol bai yusim nau

long bringim gutpela helta sevis insait long ANGAU Memoriel Haus sik.

Dokta Kenyherc i tok, "Taim mi kisim wok olsem CEO, mi bin wok klostu wantaim Australia Hai Komisen long kisim dispela kain helpim.

Dispela ol guds na sevis na infrastraksa bai helpim m i p e l a longkampapim gutpela wok i bin kamap long dispela kain wok patnasip.

Insait long Sastenebol Populesen Projek, Marie Stopes PNG i bringim gutpela sevis bilong volantri Famili Plening sevis long nupela lain insait long ol wan wan provins we ol i bin makim.

Ol dispela provins em Nesenel Kepital Distrik, Lae long Morobe provins, Madang, Milen Bei, Sauten Hailans na Enga.

Dispela wok i go bikpela em inap long Marie-Stopes i Salim

GUTPELA wok Poroman namel long Dipatmen bilong Nesenel Plening na Monitaring na Marie Stopes PNG i kamapim wanel Sastenebol Populesen Projek long soim ol wok kamap bilong dispela wok patnasip.

Marie-Stopes i holim wanel kibung long Laguna Hotel long Tunde 23 Februari long soim wanem ol gutpela wok i bin kamap long dispela kain wok patnasip.

Insait long

ol tim i go long ol rurel komyuniti we i no inap long kisim ol kain sevis bilong famili plening.

Insait long tupela yia projek i bin lukim 40,000 klaien bilong Famili Plening we ol i laikim long en.

Dispela i helpim bai inap long long pasim rot bilong 32,600 moa mama long ol i no inap long kisim bel long taim ol i no redi yet, na 36 mama bai abrusim dai long taim bilong karim bebi.

Ausait long gutpela



Gutpela famili plening - Katun: Jada Wilson

helt projek i sevim PGK 4,116 288 bilong PNG Nesenel Helt Sistem.

Ol patnasip em i bikpela samting wantaim Marie Stopes Papua Niugini long bringim moa famili plening long ol provins bilong PNG.

Marie Stopes PNG i holim strong patnasip bilong em wantaim PNG Gavman, Provin-sal na distrik atoriti na ol dona ejensi we mipela i laik long

bringim famili plening long laik bilong ol pipel.

Long taim bilong bung long Laguna, Marie Stopes PNG i givim ol wok kamap bilong namba wan tu-pela yia bilong Sastenebol Populesen Projek i go long Ministra bilong Nesenel Plening na Monitaring, Charles Abel na long ol senia membina bilong Dipatmen bilong Nesenel Plening na tu long Dipatmen bilong Helt na ol nara-pela stekholda.



Wanel nupela foklip em i wanel bilong ol ikwipmen we ol i givim i go long ANGAU CEO, Dokta Christopher Kenyherc. L-R Spectra Indastris Lae Brens Menesa Noly Yap i givim ki long Dokta Kenyherc. Poto: Australia Hai Komisen

# Ol meri long Mosbi i gat nupela bas

OL meri na ol mama long Mosbi i kien amamas bikos ol i gat narapela nupela bas long kisim ol i go long wok, bisnis na ol sevis ples olsem ol hausia sik na skul.

Dispela i kamap wantaim lons bilong nupela publik bas bai ran olsem long 9 Mail i go long M<sup>anu</sup> bi-hainim 3 Mail Haus sik rot.

Dispela em i namba tu long ol Meri Seif bas na inap karim 50 meri long en.

Ginigoada Dvelopmen Faundesen na UN Meri i bin lonsim dispela namba tu nupoela Meri Seif bas long las wok Fraide.

Namba wan Meri Seif bas em ol i bin lonsim mna givim long 2014, na i ran gut yet tude.

Dispela i kam long wankain arenjmen nam, el long Ginigoada na UN Wimen.

Namba wan bas em i kala pepel, i save mekim ran bi-long em namel long taun na Gerehu.

Sapot long bas long dispela yia i kam long Pot

Mosbi samba bilong Komes na industri, PricewaterhouseCoopers, CLP Group na Digicel.

Moa long 400 meri i save yusim disp-ela bas sevis long wan wan de.

Long taim bilong lons, mausman bilong ol UN Meri long PNG, Jeff Buchanan i biin tok amamas long Ginigoada long patna wantaim ol (UN Meri).

Em i bin tok strong olsem i bikpela samting long gat ol Meri Seif Bas long siti bikos ol mweri i pilim seif long raun long kain bas olsem.

Operesen bilong Meri Seif Bas i wapela long ol rot ol i gat mplen long en long daunim vailens long ol meri na ol yangpela gel long publik trentspot o ol PMV bas insait long Mosbi siti.

Gavman bilong Australia na UN Wimen Neseenl Komiiit bilong Australia i givim K6 milien long sapotim ran na operesen bilong Seif publik Trentspot Program insait long tripela yia i kam.

Fanding bai karamapim oporesen bilong Meri Seif bas, traum ticketing na i no peim kes, kamapim gut ol bas stop bihainim ol ripot long sefti bilong ol meri, wok wantaim ol rot sefti atoriti na olo PMV draiva long daunim na kamapim gut ol rot long vailens egen-sim ol meri na olo gel long publik trentspot na kamapim senis long pasin kempen bi-long edresim vailoens egen-sim ol meri na ol gel.

Ripot long wok painim we UN Meri i bin wokim long 2014 i soim olsem 90 pesen long ol meri i bin kisim vailens egensim ol merit aim ol i kisim publik trentspot.

Dispela em long taim ol i wetim bas long ol bas stop, sindaun insait lonbg bas, wokabaut i go long bas stop na sindaun insait long teksi taim ol i kalap long teksi.

Samting we ol meri na ol gel i save bungim planti taim na putim ripot long ol em, ol toktok long seks, stil long ol, pretim ol, holim ol meri long pasin sem hap na

ol man i soim sem long ol.

Stadi i soim tru olsem ol meri i save raun moa insait long wapela wok long bas winim ol man.

Ripot i soim tu olsem bikos i no gat planti nara-pela rot long raun na publik trentspot, ekspiriens long vailens taim ol meri i kisim publik trentspot i kamap planti insait long Mosbi siti.

Bot memba bilong Ginigoada, Rabura Aiga i tok tenkyu i go long sapot we Nesenel Kapitel Distrik Gavana, Powes Parkop long donetim dispela bas i go long ol lain i makim Australia.

Em bin tok Gavana Parkop i sapotim dispela program bilong helpim ol meri.

Pasto Mike em Menesa bilong Ginigoada Faundesen i tok em i laikim stret nde we bai Pot Mosbi i no nidim ol dispela bas, tasol inap dispela taim i kamap, Ginigoada bai wok patna wantaim ol UN Wimen long lukim olsem ol meri, ol gel na ol pikinini i raun gut long siti wantaim no gat lain i mekim nogut long ol.

## “Save na mekim”

I kam long liklik buk, Stori na Wok, Elizabeth Cox i raitim

## Diwai Frut

**Toksave:** Yumi ol manmeri bilong Papua Niugini i save painim planti pikinini bilong diwai bilong kaikai insait long bus. Yumi save planim kokonas, buai na daka insait long ples tasol yumi no save planim planti frut.

Long sampela hap we ol misin i bin wok bipo, yu ken lukim planti gutpela diwai prut ol i bin planim – swit muli, mango faiv kona frut, yambo, kapiak bilong waitman, na planti moa. Ol dispela kain frut ol i swit moa, dispela i gutpela tru long bodi bilong yumi. Tasol long planti ples yu ken lukim ol dispela gutpela samting i save pundaun nating na sting long graun.

Planti narapela kantri i stap klostu long Papua Niugini na i hat olsem yumi, ol i save planim moa kainkain prut bilong kaikai gut na long salim wantaim. Tasol long yumi i hat tumas long painim frut long maket.

Planti long yumi, save planim banana, popo, na painapal. Tasol planti popo i save sting nating, o blak bokis i kaikai, na tu planti man isave salim painapol o ananas long kisim mani.

Sampela man ol i tingting prut em i kaikai bilong pikinini tasol. Tasol em i rong tingting. Frut i save helpim bodi long winim sik na mekim sua i drai hariap.

Em kaikai bilong bikpela manmeri wantaim!

Sapos yumi planim diwai prut, yumi no ken mekim nating. Taim yumi planim kopi o kaukau diwai, yumi save wokim gut neseri pastaim. Bihain, taim yumi planim yumi save lukautim gut na klinim i go planti yia inapt aim ol i karim kaikai.

Yumi mas mekim wankain wok long diwai prut. Sapos yumi planim diwai prut long ples, bosim gut na kisim planti gutpela kaikai bihain.

Sapos pikinini bilong yu i kalap nabaut long ol diwai kopi, na brukim han bilong ol, na kisim na pilai long pikinini i no mau yet, bai yu tok wanem? Orait tingting gut long ol diwai. Ol i bikpela samting insait long gutpela kaikai. Mekim gut long ol.

Sapos ples bilong yupela i no gat diwai prut, ol mama i ken kirapim wapela neseri. Bihainim ol lo bilong neseri kopi o kakao, tasol traum na planim ol pikinini long wanwan plastik, mambu o tin i gat hul long as bilong en.

Painim ol gutpela pikinini frut long ol diwai i save karim gutpela frut. No ken kisim pikinini long ol diwa i no karim gut.

Taim ol diwai long neseri i bikpela na strongpela yu ken planim. i moa gutpela sapos yu planim long taim bilong ren. Sapos nogat yu mas karim planti wara long ol. Taim yu planim, givim spes long ol. Wokim bikpela hul na pulimapim gutpela blakpela graun. (Rausim plastik o tin o mambu pastaim).

Makim ples yu planim long stik – nogut ol man i no lukim na katim taim ol i katim gras. Givim wara, na lainim ol drai gras (mals) raun long as bilong en, olsem rabis gras i no ken pas tumas long en. Bosim gut inap em i bikpela diwai pinis.

Tingting gut na painim gut ples bilong planim frut. Ol banana, popo na painap o ananas i save karim kwik, na yumi ken planim insait o raun long gaden kaikai bilong famili.

Tasol ol diwai prut olsem mango, muli, yambo samting ol i mas stap long ples klia. Ol bai i kamap bikpela tru na i stap karim kaikai longpela taim, winim laip bilong man.

Planim ol long ples raun long haus, arere long rot o long namel long ples. Bihain bai diwai givim gutpela ples kol long sindaun aninit. Sapos yu lukautim gut, diwai prut i save luk smat na bilasim ples.

## Gavman i welkamim nupela Ambaseda bilong Amerika long PNG



long ol taim bihain.

Ambaseda i bin kamap long kantri long dispela mun, Febueri 11, bihain em i bin wokim tok promis long Senet bilong Amerika long Janueri 22 olsem em i kamap Ambaseda bilong PNG, Solomon Ailan na Vanuatu.

Long ai bilong UIS Senet, Ambaseda Ebert-Gray i bin tok em bai go het long skruim ol gol bilong Amerika long PNG, Solomon Ailan na Vanuatu, na dispela em long inapim sastenebol, inklusiv na transperen gro long ikoSnomi na ol pipel bilong em, na tu, long ol pikinini i kamap long ol taim bihain. Na tu, long sapotim ol dispela trripela kantri long strongim edukesen, helt na sekyuriti.

Ambaseda Ebert-Gray i wok planti yia long Pasifik ryon.

James Kila i raitim

OL MAMA na ol yang-pela meri bilong Sepik i soim stret kala na stail long wokim kain kain ol bilas na hend-kraf long salim long ol turis long Madang long Sande taim bikpela turis sip Pacific Aria i go sua long Madang.

Ol dispela meri i bin salim ol nekles ol bilas bilong han na kain kain ol bilas we ol turis bi-long Australia i man-galim stret na baim.

Long wok Sande i lukim ol kraf-maket i stat long geit bilong

mein wof. Ol arapela kraf maket i stap fran long Haus Kaving na liklik bris long Madang Risot Hotel.

Planti ol mama na yangpela meri bilong ‘PS Kantri’ long Is Sepik husat i save stap long Madang long Sende taim bikpela turis sip Pacific Aria i go sua long Madang.

Tupela sista stret Michalyn na Sussana Kari i tok olsem kam bilong ol turis em olsem blesing stret long ol mama na lain

husat i save wokim ol hendkraf na salim. Dispela em bikps ol turis i save kam wantaim mani stret long baim ol dispela samting ol mama na meri Sepik save wokim.

Em trupela tok tupela susa stret ya i wokim bikos ol Sepik long Madang i save promotim stret turis industri long Madang provins wantaim ol kain kain bilas, bilum, nekles, Sepik basket na ol kaving we i save pulim ai bilong ol turis taim ol i go long Madang.



Tupela sista bilong Chambri Lek long Sepik Michelyn na Sussana Kari i ammas long salim sid nekles long wapela turis long Madang. Poto: James G. Kila



**Yut, Meri na  
Famili  
Pastor  
Barbara Lunge**

### Kristen i mas bilas long klos pait bilong God

KRISTEN i mas putim bilas bilong klos pait bilong God. Bilong wanem dispela em i yunifom bilong ol Kristen na em i olesem namba na strong we God i givim long yu.

Olgeta de yu mas mekim plen bilong yu insait long prea, long putim klos pait bilong ami bilong Krais. Efesius 6:12-18. 1. Hat kapa – v17 Yupela i mas tingting long God i kisim bek yupela pinis, na dispela tingting i mas i stap olesem hat kapa yupela i putim. Jisas i baim bek yupela long blut bilong em i dia tumas. Kamapim Tok hait 5:9 Na ol i singim wanpela nupela song olesem, "Yu inap tru long kisim buk na rausim olgeta gris kandel i pasim buk. Long wanem, ol i bin kilim yu i dai, na long blut bilong yu, yu bin baim bek ol manmeri, bilong givim ol long God. Yes, yu baim bek ol manmeri bilong olgeta lain man, na bilong olgeta tok ples, na bilong olgeta kain skin, na bilong olgeta kantri."

2. Raithan wantaim bainat bilong Spirit olesem Tok bilong God. Hibrus 4:12 "Tok bilong God em i gat laip, na em i wok strong i stap. Em i sap moa, na i winim bainat i gat tupela sap. Dispela tok i save sutim man na i go insait tru. Em i go kamap stret long dispela hap tewel na spirit i bruk, na long ol dispela hap skru na kru bilong bun i pas wantaim. Olesem na em i save gut tru long olgeta tingting na laik bilong bel bilong yumi.

3. Lephan –Kisim pasin bilong bilip na holim strong olesem hap plang, bai yupela inap long mekim i dai olgeta spia paia dispela man nogut Satan i save sutim i kam long yupela. 4. Pasim stret-pela pasin olesem siot i karamapim bros bilong yupela kapa bilong bilip long pasim ol spia i gat paia i kam long birua. 5. Pasim Tok tru olesem let bilong yupela, nogat giaman pasin. Sapos yu save long Tok tru, em bai mekim yu kamap fri. Jon 8:32. 6. V15 – na yupela i mas redi long autim gutnius bilong God i laik wanbel wantaim ol manmeri, na putim dispela pasin olesem su bilong yupela. "Ol manmeri i amamas tru long lukim man i kam bilong bringim gutnius." Rom 10:14-15. 7. Long strong bilong Holi Spirit yupela i mas pre oltaim. Yupela i mas strong long mekim ol kain kain beten na askim God long helpim yupela. Oltaim yupela i mas was gut bai yupela i no lusim dispela pasin. Yupela i no ken malolo. Oltaim yupela i amas prea na askim God long helpim olgeta manmeri bilong en. ves 18. Filipai 4:6 – Yupela i no ken wari long wanpela samting. Nogat. Oltaim yupela i mas tokim God long olgeta hevi bilong yupela.

Yupela i mas putim klos pait bilong God olgeta de na dispela bai mekim birua bilong yupela na yupela i gat pawa taim yupela i putim dispela klos pait.

Putim na tokaut long Tok bilong God long olgeta laip na sindaun bilong yupela.

Oi pren bioloing Nano i welkamim ol visita.

# Asbisop John Ribat i blesim klasrum long Tokarara

Frieda Sila Kana i raitim

ASBISOP John Ribat bilong Asdaiosis long Pot Mosbi i bin blesim wanpela dabol klasrum long Sen John Aposel Praimeri Skul long Tokarara, NCD long dispela wik Tunde.

"Mipela i amamas long stap hia tude long blesing wanpela klasrum. Sios em i save mekim wok olgeta taim na mipela i save amamas long lainim yupela ol pikinini. Ol pikinini em ol lida bilong mipela long bihain taim long sios, komyuniti, na kantri," Asbisop Ribat i tok.

Em i tok dispela em i wanpela impoten rot olesem na em i amamas long blesim skul.

"Amamas bilong mipela ol papamama na komyuniti memba



Asbisop John Ribat bilong Pot Mosbi Asdaiosis i kisim ol presen i kam long ol sumatin na tisa bilong Sen John Aposel, Katolik Praimeri Skul long Tokarara, bihain long em i go blesim wanpela dabol klasrum bilong ol long Tunde dispela wik. Poto: Nicky Bernard.

em long mak bilong klasrum" Asbisop i tok.

Asbisop John Ribat i bin

kamap long moning taim long blesim klasrum na bihain em i go long narapela wok. Em i no bin

Memba bilong palamen i givim ol dispela klasrum we Asbisop i blesim.

## DE BILONG AMAMAS, DE BILONG HOP

*...OL Presentesen Sister i selebretim 50 krismas long PNG*

"De bilong amamas na hop" em de we ol Presentesen Sister i bin selebretim Golden Jubilee long Faundesen De long Febueri 2, 2016.

Em i bin wanpela gutpela de stret wantaim ol gutpela memori ol i tingim long en. Ol misineri bilong Nu Silan na Australia husat i bin wok bipo long PNG i bin kam na amamasim na selebretim dispela de wantaim ol wanlai bilong ol long Aitape long Jubilee Misa lotu.

Aitape komyuniti i bin welkamim ol visita husat i bin go kamap long hap long rot i kam long Wewak.

Bikos long salens long rot na oil long kar i kapsait, ol i bin kamap leit long ol selebresen, tasol dispela i no mekim ol Sister i sori o givap, no gat ya. Welkam pati i bin givim ol gutpela welkam stret.

Ol i bin danis na singing long musik bilong paitim kundu, na putim bilas i go long ol visita. Ol i bin putim ol kain gutpela bilas olesem ol seol nekles, ol bits, ol sid bilong diwai long nek bilong ol wan wan visita.

Dispela i bin soim stret olesem dispela em i spesel samting. Ol visita i bin amamas tru long lukim na stap wantaim ol Sister na ol pipel husat ol i serim laip na wok namel long ol.

Ol pren bioloing Nano i welkamim ol visita.

50 krismas bihain, Bisop Otto Separy i bin



Ol pastaim misineri bilong Australia na Nu Silan wantaim ol PNG Sister long Aitape.

go pas long Misa Lotu long sen Ignatius Katitrel

long Aitape we ol Sister i

bin bung wantaim ol "Fren bilong Nano", Lei Asosiet, ol Riliges Sister,

Bruder na ol Pater, planti

wokman na tisa bilong Sen Ignatius Sekenderi skul.



Dispela em poto bilong ol 5-pela namba wan misineri Sister i bin kamap long Toricelli renj long Wes Sepik. Namba wan faundesen de i bin taim bilong amamas na tok tenkyu. Misa Lotu i bin prea bilong hop na tras long futja bilong ol we ol i no save bai go olesem wanem.

stap long taim Ministra bilong Helt na HIV na AIDS na Memba bi-long Pot Mosbi Notwes i kamap long opim ol dispela klasrum.

Sen John Aposel katolik skul em i bin stap 20 yia olesem wanpela katolik ejensi skul we i bin stat wantaim kindagaten, bihain elementri na nau em i stap level 5 praimeri skul.

Ol i laik go moa long level 6 olesem na em i gutpela samting long

Memba bilong palamen i givim ol dispela klasrum we Asbisop i blesim.

# APEC bung bai kamap tasol Mosbi Siti pulap long rabis



TAIM planti bikpela bung i wok long kamap long PNG, kapitel siti bilong yumi Pot Mosbi i pulap long rabis na pipia.

Dispela em i no giaman. Em i tru bikos olgeta hap bilong Pot Mosbi siti em i pulap long rabis. Long Taun, Boroko, Koki, Waigani, Gerehu, Godens, 6-Mail, Erima, na ol arapela liklik ples insait long siti, pipia em i wanpela no gut samting bai yu les long lukim.

Sampela taim bai yu les long smelim smel bilong pipia tu.

PNG i wok long holim planti ol bikpela bung. Dispela bung i stat las yia taim bikpela XV Pasifik Gems i bin kamap long Pot Mosbi.

Sampela ol bikpela bung long spot na arapela samting tu i wok long kamap long Pot Mosbi. Tasol kala bilong siti i no staph gut.

Rabis i pulap long arere long rot. Ol manmeri i no save yusim het na tromoi pipia long ples bi-long tromoi.

NCDC i mas mekim save long dispela kain manmeri husat i wok long tromoi pipia nabaut long siti.

NCDC i mas strongim polisi na lo bilong sasim ol manmeri husat i tromoi pipia nambaut long siti. I luk olsem nau yet i no gat wanpela polisi i staph long kontrolim ol manmeri long rabis bilong ol.



Rot bagarap long Manu autopot.

Boroko em i wanpela olpela ples insait long Pot Mosbi. Tasol Boroko i pulap long pipia. I luk olsem ol rabis kolekta i no save kam kisim rabis long ol rabis bin long Boroko.

Dispela kain pasin tasol mekim

na olgeta ples insait long Pot Mosbi i pulap long pipia. Sapos ol manmeri i save yusim het na ol i save tromoi rabis long ol ples bi-long rabis, siti bilong yumi bai staph gut tru stret.

Pot Mosbi bai holim sampela

bikpela miting olsem APEC lidas miting long yia 2018. NCDC no ken slip.

NCDC i mas opim ai na putim was long mekim save long ol manmeri husat i save tromoi pipia nabaut.

Ol buai selo em ol sampela kain ston het manmeri husat i no save harim toktok na i wok long kamapim rabis long Boroko, Waigani, Godens, Gerehu, Erima na Koki.

Buai na daka em i iligel samting, we lo i tok tambu long manmeri i no ken kaikai long pablik ples. NCDC i mas enfosim dispela loa.

NCDC em i kamap olsem papagraun bilong Pot Mosbi siti. Em i no ken slip na pasim ai. Em i mas kamapim ol lo na polosi long mekim Pot Mosbi i kamap wanpela klinpela taun o siti long yumi olgeta long staph na amamas wantaim.

Gavana Powes Parkop i wok long mekim planti gutpela samting long mekim siti i kamap klin na nais tru. Tasol pasin bilong manmeri tasol i wok long kamap olsem pasin bilong enimal.

Dispela em i ples bilong yumi. Pot Mosbi em i siti bilong yumi. Yumi no ken long long na tromoi ol pipia nabaut.

Yumi wan wan mas yusim het. Taim yu laik tromoi pipia, yu mas sanap na tingim. Sapos mi tromoi pipia olsem long haus bilong mi yet bai olsem wanem?

Pot Mosbi em i gutpela ples bi-long yumi. Yumi olgeta wanbel na yumi lukautim Mosbi.

## Mi ken bilip long mi yet o nogat?



Mipela i wari olsem na mipela i askim 'Mi ken bilip long mi yet o nogat'?

Sapos mipela i ken bekim olsem mipela i ken bilip orait em i olsem mipela i ken harim tok na senis.

Senis long luksave olsem i gat trupela laip, laip bilong harim tok na kamapm gutpela sindaun.

Em i no driman olsem mi staph. Nogat. Em i tru olsem mi staph.

Mi gat laip, mi gat bodi, spirit, save na i ken kamapim ol wok.

Pasin i no sensing na i go yet long i no rispekim mi yet, stil na bagarapim laip na ol samting bilong pablik na bilong ol narapela manmeri i pasin bilong man i staph long driman.

Em i soim olsem manmeri i no bilip olsem tru em i staph. Em i soim olsem em driman tasol. Em i no inap long harim tok na kamapim senis.

na mani mak bilong kain pasin i bikpela moa.

Planti i winim mani mak bilong kamapim ol haussik, baim marasin, kamapim ol skul na rot.

Long pait agensim kain pasin nogut we i bringim hevi na sindaun nogut long laip bilong ol manmeri planti ol skul toktok i kamap pinis.

Tasol i luk olsem ol manmeri husat i staph long ol bikpela opis we i mekim ol disisen long kamapim gutpela sindaun bilong manmeri i no senis.

Long dispela wok mipela i harim Transperensi Intanesel i askim Gavman long stop long noken toktok long kamapim ol bikpela wok we manmeri long kantri i no nidim tasol i mas senis na mekim wok long pait agensim pasin korapsen na lusim nating pablik mani long ol samting we wanwan manmeri bai kisim helpim long em.

Moa yet em i tok long taim kantri i wok long bungim hevi bilong mani, Gavman i tok long stretim Pot Mosbi Intanesel Jackson Airport.

Long dispela Transperensi Intanesel i tok mas lusim dispela na yusim liklik mani em i gat long strong wok bi-long helt, edukesen, rot na loa na oda.

Em i gutpela Gavman i mas bilip long em i tru em i staph, i ken harim tok na kamapim ol wok we i strongim tru laip bilong ol manmeri.



Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

**Telephone: (675) 325 2500**

**Fax: (675) 325 2579**

**Email: editorial@wantok.com.pg**

**Pe bilong wanpela yia  
52 niuspepa**

**Ples:**

PNG

AUSTRALIA

ASIA PACIFIC na JAPAN

AMERICA na EUROPE

**Air:**

K220.00

US\$110.00

US\$150.00

US\$210.00

**General Manager**

Elizabeth Konga

**Editor**

Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Rivyu bilong Osenia Miks Tim Sempion

*Badminton bai lait long PNG klostu taim...*

**Philemon Tame  
i raitim**

**BADMINTON Osenia  
Miks Tim Sempionsip  
resis long X-TRM  
North Harbor Centre  
long Oklan, Nu Silan i  
bin stat long Tunde  
16 Febueri we 6-pela  
kantri i resis.**

Resis i kamap insait long tripela de. Ol i bainim raun ribon fomet o rot we Australia na Nu Silan i wet long top. Guam, Nu Kaledonia, Tahiti na Tonga i resis na tupela top tim i resis wantaim Australia na Nu Silan.

Kosa bilong Tim Guam, David Yao na pilaia bilong Guam, Michelle Kremper, i tok em i amamas long pilai. "Mi no save long wanem kain mak ol narapela pilaia bai pilai, tasol mi tingting long winim wanpela resis."

Developmen Opisa bilong Badminton Tonga, Lauti Naaniumotu i tok em i amamas long dispela resis. Ol pilaia i go pas long Tim Tonga em Naaniumotu, Metuisela Vainikolo, Lusia Ki Taulanga na Litea Lupe Moe Valu Tatafu.

Ol pilaia bilong Tahiti na Nu Kaledonia em ol gutpela poro tru i resis ol yet long las wik Mande. Insait long pilai graun, ol i kamap olsem birua na ol i resis,

tasol ausait em ol poro tru insait long siks o seven yia. Resis i kamap strong namel long tupela wantok tim.

Ol skwat bilong Nu Kaledonia em Yohan De Geoffroy, Ronan Ho-Yagues, Thomas Lahaut, Loic Mennesson na Fabian Nadmimin.

Skwat bilong Australia na Nu silan i wet long resis long Stej tu.

Nu Kaledonia i pilai egensim Guam na Tonga i resis wantaim Tahiti long stej wan resis i stat long Tunde long 10.00 klok moning.

Long 04.00 kilok avinun, Nu Kaledonia i pilai egenisim Tahiti na Tonga i pilai egenisim Guam.

"Tasol, Badminton i redi long kamap long kamap long PNG," Developmen Menesa, Nadia Bleaken, i tok.

"Mi bin go long PNG long 2011, bihain long Pasifik Gems i kamap long Nu Kaledonia, na mi lukim olsem i gat planti lain i save pilai Badminton.

"Mipela i laik kamapim wanpela Badminton Skul Program na em bai kamap long Pot Mosbi bikos ol pipel i save gut long pilai dispela spot.

"PNG em i yangpela kantri na em i bin lukautim gut Pasifik Gems long las yia na em i bikpela samting

long PNG bai skruim wanpela moa spot long kantri.

"Nau PNG i no resis long Badminton Osenia Miks Tim Sempionsip resis, tasol em i gat rot stap long go insait long Badminton Wol Federesen."

Piksa i soim Badminton Osenia Developmen Menesa, Nadia Bleaken.



Tonga i resis wantaim Tahiti long las wik Tunde long Osenia Miks Tim Sempionsip long X-TRM Not Haba Senta. Piksa i soim Tim Tong wantaim ret siot, Lauti Naaniumotu long lep han na Lupe Moe Valu Tatafu, i daunim Tahiti wantaim 21-18 na 21-15 long Miks Dabol resis.



Tupela pilaia bilong Nu Kaledonia wantaim blek siot, Johanna Kou na Loic Mennesson, i daunim Michelle Kremper na David Yao we skoa i sanap olsem 21-12 na 21-6 long Miks Dabol resis.

Piksa i soim Tonga i pilai egensim Nu Kaledonia long las wik Trinde. Nu Kaledonia wantaim Blek siot i daunim Tonga, 4-1.

# Putim moa mani long egrikalsa

**EGRIKALSA** sekta i save lukautim klostu long 87 pesen manmeri bilong Papua Niugini (PNG). Dispela i soim olsem laip bilong moa long 6.5 milien manmeri long PNG i save i stap long egrikalsa sekta.

Taim komoditi prais bilong oil, ges, kopa, gol, nikel na arapela ol mineral i na petroleum prodak i pundaun i kam daun long wol maket, wapelala save man long ikonomi i tok gavman i mas nau lukluk long egrikalsa.

Spesel Ikonomik Edvaiasa bilong PNG Gavman, Dokta Jacob Weiss, i tok gavman i mas nau lukluk long putim moa mani i go insait long egrikalsa sekta bikos PNG i gat bikpela sans na planti gutpela samting long kirapim egrikalsa sekta.

"Bihain taim bilong dispela kantri i stap long han bilong egrikalsa. Yumi toktok long kirapim egrikalsa na SME bisnis i gutpela samting. Mi amamas stret long dispela, yumi toktok moa long egrikalsa," Dokta Weiss i tok.

Em i tok wapelala gutpela as bilong kirapim egrikalsa long PNG em i bikos ol manmeri PNG i save gut tru long planim kaikai, lukautim ol enimal, mekim hat wok na i save bihainim toktok.

"Ol manmeri PNG i fit stret long wok long egrikalsa sekta. Dispela i soim olsem gavman i mas putim moa mani i go insait long kirapim egrikalsa sekta," Dokta Weiss i tok.

Em i tok gavman i no ken lukim bikpela driman na toktok planti tasol em i mas mekim sampela liklik

samtina long kirapim dispela egrikalsa sekta.

PNG i save yusim K2 bilien long baim ol kaikai olsem mit, kakaruk, prut, na sampela ol kaikai i kam aninit long egrikalsa long ol ovasis kantri.

"Yumi gat gutpela graun long hia. Yumi ken sevim dispela K2 bilien na mekim moa mani," Dokta Weiss i tok.

Oposisen Lida Don Polye i gat wankain tingting olsem Dokta Weiss. Mista Polye i wok long sin-gautim gavman long lukluk long egrikalsa.

Em i laikim gavman long kirapim nupela rot, putim pawa saplai, haus sik, strem maket, na givim moa mani long ol liklik manmeri long ples long planim kaikai na lukautim kakaruk, pik or arapela enimal.

Em i tok PNG i gat gutpela graun long planim ol prut olsem painapal, orems, muli, lemon, mango, watamelon na ol arapela prut.

"Yumi gat gutpela graun. Graun bilong PNG i no save nidim fetilaisa. Gavman i mas sapotim ol manmeri long planim ol kainkain prut.

"Yumi ken salim ol dispela prut long PNG yet na sampela salim i go aut long ovasis maket," Mista Polye.

"Gutpela rot em i wapelala ki samting long kirapim egrikalsa invesmen na bisnis. Ol manmeri mas gat gutpela maket. Maket em i wapelala ki samting tu.

Praim Minista Peter O'Neill i tok pastaim gavman i no bin lukluk long sapotim invesmen long egrikalsa sekta.

Tasol nau O'Neill-Dion gavman luksave long egrikalsa na i wok long mekim sampela gutpela samting long kirapim dispela nambawan sekta bilong ikonomi bilong dispela kantri.

Mista O'Neill i tok gavman i gat plen long bungim wapelala bikpela mani long kamapim egrikalsa fan long helpim ol liklik fama i kisim dinau mani long statim egrikalsa bisnis.

"Ol lokal fama na ol manmeri long egrikalsa sekta i ken kisim dinau mani long dispela fan na kirapim SME bisnis long egrikalsa sekta," Mista O'Neill i tok.

Em i tok pastaim gavman i bin givim klostu long K500 milien long sampela ol fama na ol manmeri husat i save planim kaikai na husat i mekim egrikalsa bisnis tasol dispela mani i no karim gutpela kaikai.

"Gavman i bin givim mani long sampela fama long planim kaikai na mekim egrikalsa bisnis. Tasol dispela i no karim gutpela kaikai. Ol i bin kisim bikpela mani tasol no gat wapelala fam i kirap," Mista O'Neill i tok.

Em i tok pastaim Egrikalsa Beni i save givim bikpela mani i go long sapotim ol fama bilong kakao, kopi, kopra, wel-pam, na arapela ol egrikalsa kaikai tasol bisnis bilong dispela ol lain i no kamap bikpela nau long dispela taim.


"Egrikalsa benk i save sapotim ol fama bilong yumi long ples. Ol i save kisim gut bikpela mani. Tasol ol i no kirapim bisnis bilong ol. Bisnis i dai," Mista O'Neill i tok.




Bulmakau



Kakaruk



Pik



Pis



Kopi

Kopra

# Lukluk raun long wiken na amamas

Nicky Bernard i raitim

**Planti manmeri na pikinini i save laik long raun long lukim ol narapela famili long wiken taim ol kisim malolo long wok na skul.**

Wantok Niuspepa i raun long wiken na bungim sam-pela famili i raun na ol wantok bilong ol long wiken.

Wiken em i gat tupela de tasol long malolo na yu ken raun na bungim ol famili, wantok na ol poroman. Narapela ol de em taim bi-long skul na wok.

Yu ken bungim ol famili long haus bilong ol o famili bung, na ol i makim hap bi-long yupela long go bung o pilai graun bai yupela gen bung long en.

Planti famili i save bung long pilai graun we ol go long lukim pilai na ol i ken bung na amamas wantaim long lukim pilai.

Long wiken i go pinis planti bikpela pilai i kamap long Mosbi na dispela taim planti famili na poroman bin pasim tok long bung long ol pilai hap long Mosbi.

Wanpela bikpela pilai i kamap em long Gavana Parkop Ragbi Yunien Kap. Dispela pilai i pulim planti long tim i kam resis long winim taitol bilong dispela resis.

Ol tim long Bogenvil, Madang, Aroma na sam-pela moa insait long Mosbi. Dispela ol tim i pulim ol wantok na poroman long kam lukim na singaut na amamas wantaim.

Taim ol Bogenvil tim go in-sait long pilai graun ol man-meri bilong Niugini Ailan i

sanap long pinga bilong lek bilong na singaut long tim Bogenvil.

Tim Madang tu osem, ol manmeri na pikinini i no bin sindaun gut na lukim pilai, ol kalap na singaut na mekim ol narapela tim tu i no pilai gut.

Dispela tupela de kompetisen i pulim planti manmeri na pikinini bilong Papua Ni-ugini long kam bung na lukim pilai.

Long soka tu wankain long wanem tupela top tim bi-long Pot Mosbi i bung long strongim ol long stap insait long fainol bilong Nesenel Soka Lig.

Rapatona FC i kam wantaim bikpela sapota bilong ol, Hekari tu i kam wantaim ol sapota bilong ol na Bisini soka graun i kamapim planti nois wantaim singaut bilong ol sapota.

Long komyuniti pilai, Gordon Tas i save pulim planti ol manmeri na pikinini. Tru tru sapos yumi askim wanem ol kompetisen i save pulim planti ol sapota na ol manmeri na pikinini long lukim pilai, Gordons tas bai winim planti long sait bilong ol sapota. Wiken i kam na go, tasol dispela komyuniti kom-petisen i save pulim planti ol manmeri na sapota.

Planti long ol famili i save go bung tu long Gordons ragbi tas long wanem em ples bilong amamas na ol manmeri i save laikim long wanem dispela komyuniti spot i stap insait long Polis Bareks na ol manmeri na pikinini i pilim sef long ol go amamas wantaim ol famili bilong ol long Gordons.



**KAM SAPOT:** Sampela bilong ol famili kam sapotim tim bilong ol long Bava park taim Gavanas Kap i on.



**KAM BUNGIM ANTI:** Kimberly Bernard i save stap long Gerehu st 1 em raun long wiken long Gordons Polis Bareks na bungim anti Helen Kodana i mekim liklik maked bilong em taim ragbi tas resis i pilai stap. Anti bilong em Helen i no lukim longpela taim na taim tupela bung, tupela i holim pas na amamas. Ol foto: Nicky Bernard



**PRAIVET TAIM:** Dispela tupela marit i kisim taim long tupela kamap aut na lukim pilai. Olgeta taim ol save stap long haus na putim was long ol pikinini o bi-hain laik bilong ol pikinini long taim bilong wiken. Ol papama-ma tu mas kisim liklik malolo na kam aut long haus na raun ol yet. Dispela tupela yangpela marit save bisi stret long wok bi-long ol na tu lukluk long ol pikinini. Tupela kisim gutpela malolo long taim bikpela pilai namel long SP PNG Hunters na Penrith Panthers taim ol kam pilai long Nesenel Futbal Stadium long las Mun.





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Planti lain Bogenvil ausait long ailan i no save long referendam

Sam Seke i raitim

Wanpela senia jenelis bi-long Bogenvil, Tom Kathoa i tok i luk olsem planti pipel bilong Bogenvil husat i stap long Bogenvil na ol arapela provins long Papua New Guinea i no save long sait long referendam we Bogenvil i wok long bihainim.

Atonomas Rijon bilong Bogenvil bai holim referendum o vot long 2019 - long sapos ol bai kisim independens long Papua New Guinea o no gat.

Mista Kathoa em i go bek tasol long Bogenvil aste bihain long em i bin stap 10 pela wik long Is Nu Briten provins.

Em i tok insait long dispela taim, em i bin wok long karim aut awenes long ol wok long referendam, gud gavanens na weapons disposal o rausim ol gan long



Ol pastaim paitman long ples Katukuh long Siwai, sautwes Bogenvil Poto: Aloysius Laukai

Bogenvil we i go het nau ya long Bogenvil.

Tasol Mista Kathoa i tok em i painim aut olsem ol Bogenvil pipel i stap long Is Nu Briten i no save gut long wanem i go het long ol dispela eria.

Em i tok, Is Nu Briten i stap klostu long Bogenvil na sapos ol lain Bogenvil long hap i no save gut long wokabaut bilong referendam, i min olsem olgeta long ol narapela provins long PNG bai wankain tu.

Sam Seke i raitim

DISPELA askim i stap long wanem i bin gat isu long sampela publik sevan i no bin no kisim pe bilong ol long planti de.

Maski olsem, gavman i tok sait long mani i orait - na hevi i kamap long sait long perol sistem.

Tasol dispela longpela dilei long pe o ol i no kiswim

## PNG gavman i gat mani hevi o nogat?

be long taim stret i mekim ol publik sevan i kisim taim tru.

Seketeri bilong Treseri, Dairi Vele, i bin tokim NBC olsem i nogat wanpela kes flo-flo hevi long gavman.

Wanpela senia ripota bi-

long NBC, Rose Amos i ripot olsem ol woka bilong NBC na Palamentei Sevis i bin kisim potnait bilong ol wanpela wok bihain.

Em i tok pe bilong ol narapela publik sevan i wok long dilei tu.

## Partners With Melanesia 3-Dimension Developmen

Caroline Tiriman i raitim

Partners With Melanesia NGO i wok long skulim wanpela kain developmen long ol komyuniti.

Long Is Nu Briten Provins, ol pipel bilong Pomio em ol i stap long bodamak wantaim Wes New Britain provins klostu bai kisim skul long save moa kain wok developmen em ol i kolim tri daimensenel modeling.

Dispela i min olsem ol saveman i save mekim ol samting o ol model we em i soim stret rot we ol haus, ol bik bus, ol riva, na ol bikpela maunten na ol pipel i ken lukim stret long ai bilong ol.

Nau ol pipel bilong Pomio bai kisim trening long save



Poto: Kenn Mondiai, Eksekutiv Dairekta bilong Partners With Melanesia. Poto: ABC

moa long dispela 3 daimensenel modeling long helpim ol wantaim sindaun bilong ol long ples, long taim nogut na tu long gutpela taim.

Kenn Mondiai, Eksekutiv Dairekta bilong Partners

with Melanesians bai givim dispela trening.

Em i givim pinis tu ol wankain trening long ol kantri olsem, Solomon Ailan, Samoa na Trinidad na Tobago long Caribbean.

## PNG i mas pinis nau long paitim ol meri na pikinini

Mipela inap long vailans, no ken paitim meri, na no ken bagarapim pikinini. Ol dispela hap tok em ol het tok bilong wanpla wokabaut em Women Arise PNG na Gava na bilong Nesenel Kapitel Distrik i bin mekim long Sande long Pot Mosbi.

Dispela wokabaut em bi-long sapotim laik bilong ol meri na pipel long stopim pasin bilong vailans long komyuniti.

Ol i bin mekim dispela wokabaut, em planti handed pipel i bin stap long en long Valentines Day.

Papua New Guinea i gat nem nogut long vailans egensis ol meri na pikinini, na ol lida bilong Women Arise PNG i tok, ol inap long violens.



Wanpela meri bliong Kaiwe, Westen Hailans ol i paitim na kukim skin bilong en. Poto: Paul Petrus

## Angliken Sios long Solomon bai strongim wok bilong yut

BIKPELA sios long Solomon Ailans, em Angliken Sios o Sios ov Melanesia i luksave olsem em iu mas strongim moa wok bilong ol yut insait long kantri.

Kodineta bilong Faith ov

Mission na Yut long Sios, Pater Nigel Kelaepa i tok ol itok strong long dispel samting insait long yut konvensen o bung we olgeta daiosis Sios bilong Melanesia i bin holim long las yia.

Em i tok olsem hap long wok bilong strongim ol yut bilong Sios ov Melanesia em long riviuwim o glasim yut polisi bilong sios olsem em i ran gut o no gat.



2014 Yut Reli long Honiara Poto: Sandra Bartlett. Poto: ABC

## Sogavare laikim stabiliti long Vanuatu na Melanesia

Sam Seke i raitim

PRAIM Minista Manasseh Sogavare bilong Solomon Ailan i tok em i laik lukim politikol stabiliti i go het long Vanuatu.

Vanuatu i bin gat hevi long politik bihain long Suprim Kot

i bin salim 14 palamen memba i go long kalabus na presiden i rausim palamen. Mista Sogavare i tok Solomon Ailan i amamas long helpim long sait bilong ileksen wantaim ol patrol bot.

Em i tok em i bilip olsem nupela Praim Minista, Carlot

Salwai, bai go pas na ranim gut stebol gavman long Vanuatu wantaim majoriti vot long em. Praim Minista Sogavare i wokim ol dispela toktok insait long intaviu wantaim niusman, Hilaire Bule, long Port Vila.

# Fiji i kisim bikpela hevi long Saiklon Winston ...6-pela i dai



Ol famili long Wainiveidilo setelman i redim lans kaikai long skul eria we ol i yusim olsem kea senta long Navua, Fiji, long las Sande, Febueri 21, 2016, biahin long Saiklon Winston i kamapim bikpela bagarap long kantri. Ol opisal long Fiji i wokim ol ripot long ol bagarap we saiklon i kamapim long ol liklik ailan. Poto: Jonacani Lalakobau/Fiji Times via AP.

**Bikpela saiklon o strong-pela win long rekod insait long Sauten hemisfia na kantri i bin kamap long Fiji long las wiken na kamapim bikpela bagarap tru long ol ples na pipel long ol liklik ailan. Strong na ron bilong saiklon em 285 kilometra long wanpela awa.**

Planti haus i pundaun, no gat pawa, no gat wara na 6-pela pipel i dai long dispela strongpela win.

Ol i bin putim kefiu o taim tambu long Sarere na 30 de

dekleresen naturel disasta long larim ol na imejensi lain i mekim ol wok painim na ripot bilong ol.

Fiji Disasta Opis i tok ol i putim moa long 400 pipel long 32 imejensi kea senta i stap.

Ol skul na yunivesiti long kantri i stap pas long wanpela wok bihainim dispela saiklon na bagarap em i kamapim.

Fiji i wanpela turis kantri na ol i bin stopim ol ran bi-long balus tu long wiken.

Planti pipel i wari na paul long dispela bikpela rekod saiklon i kamap na bagarapim ol.

Ol ami na polis i helpim long jenerel rekyu na klinap operesen taim ol gavman opisa i wok long klinik ol rot na putim bek pawa.

Praim Minista bilong Fiji, Frank Bainimarama i tok Fiji bai stap yunited long dispela taim bilong sori na helpim wanpela narapela. Fiji i gat 900,000 pipel.

# Macedonia i no laik opim boda long ol Afghan refuji

Planti tausen refuji bilong Syria na ol arapela Midel is kantri i wok long painim rot bilong ol i go long ol kantri long Yurop.

Long las wiken, ol ripot i tok kantri Macedonia klostu long Greece i pasim boda bilong em long ol refuji bilong Afghanistan, tasol em i larim ol lain bilong Syria na ol arapela i go insait.

Tasol wanpela mausmeri bilong Macedonia i tok kantri bilong em i no stopim ol refuji bilong Afghanistan, Serbia em neks kantri long rot we ol refuji i bihainim

long go long ol kantri long Westen Yurop.

Long wiken, moa long 80 bas i wok long wet long boda kem bilong Idomeni namel long Greece na Macedonia long karim moa long 5,000 refuji i go aut long boda.

Polis long Greece i tok Serbia i wokim dispela disisen bikos Serbia i wokim wankain disisen na ol bikman long Macedonia i pret nogut ol planti tausen refuji i pas long hap.

Long las yia, moa long milein refuji i bin go long ol Yuropien Yunien kantri.

Ol kantri long ol rot na boda ol refuji i painim we long go insait i tok ol bai kontrolim ol lain refuji long ol eria bilong ol. Wanpela opisal long Greece i tok ol i wok long kontrolim ol planti refuji i wet yet long hap bikos ol pepa bilong ol i no stret na dispela i ken kamapim moa hevi.

Tasol planti refiji i wok long go insait abrusim ol boda kantri i go long ol EU kantri. Plant i wokabaut long ples kol na ol arapela hevi long painim ples na kantri long stap long en.

## Ol IS i bomim Syria no gut tru na ol wol pawa painim rot long stopim

SAMTING olsem 130 pipel i dai pinis long Damascus na Homs long kantri Syria biahin ol Islamik Stet (IS) grup i bomim ol siti long las wiken, Sarere.

Ol IS i laik kisim Aleso siti long not Syria.

Ol wol pawa i laikim ol grup i pait i stap long sispaia o stop long pait.

Boming i kamap bihain tasol long US Stet Seketeri,

John Kerry i tokaut olsem ol i kamap wantaim agrimen long stop pait.

SANA nius ejensi i tok ol bom long Sayyida Zeinab em wanpela sabeb long Damascus i kilim 83 pipel na kamapim bagarap long moa 170 pipel.

Ol ripot i tok bom na man i dai i kamap klostu long wanpela skul na long apinun we planti pipel na ol kar i raun.

Dispela eria tu i gat wanpela holi o suntu ples bilong ol Shiite Islam na Hezbollah. Muvmen na ol narapela ami bilong ol i save lukautim gut dispela hap.

Kar bom na tupela susaid boma i kamapim dispela birua.

Long siti bilong Homs, 46 pipel i dai na planti i kisim bagarap. Klostu long ol, narapela 57 pipel i bin dai tu.

## Klostu painim banis marasin bilong Zika binatang



The Zika vairas i go hert long kisim moa pipel virus Westen Hemisfia na wari i go bikpela na moa yet, long ol bel mama bikos dispela vairas we moskito i givim i kamapim sik long ol bebi mama i karim bai gat sik ol i kolin maikrosefali o liklik het na kru bilong tingting bai i no gutpela tumas.

Wol Helt Ogenaisesen (WHO) i tok ol i wok long tra'im marasin bilong dispela sik na ol i ting olsem ol bai painim insait long wanpela yia.

WHO i tok 15-pela kampani i wok nau long painim na kamapim marasin bilong banisim Zika.

Dipatmen bilong Homeland Security i autim ol plen bilong em na tok em i wok wantaim U.S. Centers for Disease Control and Prevention (CDC) na Dipatmen bilong Helt na Humen Sevis long daunim dispela vairas o binatang.

Long wankain taim, intanesenel Olimpik Komiti i tok no gat kantri i rausim ol pilaia long bikpela Olimpik pilai bai kamap long Brazil long neks yia, bikos lobng Zika vairas long hap.

Ol sain o mak long sik Zika em skin i hat, ol liklik bukbuk o 'rash' long skin, kru i pen na ol kain sain olsem. No gat lain i slip long haus sik bikos long Zika vairas sik.

Man o meri i kisim Zika vairas taim Aedes aegypti moskito i kaikaim em, wankain moskito i karim dengi fiva. Ol i luksave tu olsem Aedes albopictus moskito i karim Zika vairas.

Pastaim long ol i painim long planti tropikel kantri long Afrika, Sautsia Esia na Pasifik.



Wanpela wokman i bamim wanpela ples egensim Aedes aegypti moskito to stopim binatang bilong Zika, Chikungunya na Dengi i go long moa pipel long Acapulco, Mexico. Poto: ABC

# No ken guria long forex i pinis

**MANMERI PNG i no ken guria nating long ol foren risev o forex i wok long isi isi pundaun i kam daun, spesel ikonomik edvaisa bilong gavman, Dokta Jacob Weiss, i tok.**

Dokta Weiss i tokim bung bilong Lidas Samit las wok long Pot Mosbi olsem foren risev bilong PNG i wok long pundaun go daun taim prais bilong ol komoditi i wok long pundaun stat long yia 2012.

Em i tok taim Ok Tedi Main i pas long mun Ogas las yia, dispela i lukim ol foren risev bilong PNG i wok long pundaun i kam daun.

Ol foren risev o forex em ol mani bilong Amerika o Amerikan Dola PNG i save kisim long ol komoditi o ol samting PNG i save salim i go long arapela kantri.

Ol arapela kantri i save yusim Amerikan Dola long

baim ol samting bilong PNG na dispela mani bilong Amerika i save kamapim foren risev bikos pasin bilong baim na salim ol samting long intenesen maket i save kamap long Amerikan Dola o US Dola.

Tasol Dokta Weiss i tok PNG i wok long kontrolim maket bilong forex.

"Yes, forex bilong PNG i wok long sot. Bai yumi wet long gutpela taim long kam. Tasol nau yet, Benk ov PNG i wok long kontrolim foren risev na eksens ret bilong PNG.

"Dispela em i gutpela samting mipela i kamapim bikos dispela hevi bilong foren risev bai pinis klostu taim.

"Mipela bai opim Ok Tedi Main gen na dispela bai helpim PNG i kisim bek moa foren risev," Dokta Weiss, husat i wanpela dairekta bi-



**Dokta Jacob Weiss**

long OTML, i tok.

Dokta Weiss i tok egrikalsa bai sevim ikonomi bilong PNG taim kantri i bungim dispela kain hevi taim prais bilong mineral na petroleum i go daun.

"Long bihain taim, egrikalsa bai helpim PNG long kirapim ikonomi na senisim laip bilong manmeri," em i tok.

## Botten: Prais bilong oil bai kirap gen

MENESING Dairekta bilong Oil Search, Peter Boten, i tok prais bilong oil bai kirap bek na go antap gen hariap tru.

Mista Botten i mekim dispela toktok las wok Trinde long 2016 Lidas Samit long Pot Mosbi taim em i makim maus bilong bisnis komuniti long PNG na givim toktok long sait bilong oil na ges bisnis long

Em i tok taim prais bilong oil i pundaun, dispela i pasim rot bilong sampela moa oil projek i kamap long kantri.

"Long wol LNG maket, dispela 5-perla yia, stat long dispela yia na pinis long yia 2020 bai lukim 40 pesen bilong nupela LNG prodaksen i kamap long wol," Mista Botten i tok.

Mista Botten i tok i gat planti LNG projek i kamap long planti kantri na wol maket i pulap long LNG.

Tasol LNG bilong PNG em i stap long gutpela mak bikos ol kastoma long Japan, Saina na Taiwan i wok long baim.

Mista Botten i tok Oil Search i wok long gro na kamap wanpela biknem oil, ges na LNG kampani long Esia-Pasifik rion.

"Yumi gat sampela gutpela projek i kamap long ples bilong yumi. Ol investa na fainensa i lukim PNG LNG projek olsem wanpela wolkas ges projek.

"Dispela i mekim ol arapela biknem kampani tu i wok long putim ai long petroleum na eneji industri bilong PNG," Mista Botten i tok.



Wantok Fail piksa i soim Peter Botten (namel) i sanap wantaim Praim Minista Peter O'Neill, Hela Gavana Anderson Agiru na ol arapela lida long taim bilong komisiniim PNG LNG Projek long yia 2014.

## Westpac i holim "Wokabaut long Laip"

NAMBA wan benk bilong PNG, Westpac PNG, i amamas long holim namba wan "Wokabaut long Laip" wantaim sapot bilong opis bilong Nesenel Kepitel Distrik (NCD) gavana long las wok Sande.

Moa long 32, 500 manmeri long Pot Mosbi i bin kirap na lusim haus long 4 klok moning na kam kamap long Unagi Fil long Godens long 5 klok moning.

Ol manmeri i mekim yoga long 5-klok moning long Unagani fil na bihain ong en, ol i wokabaut bihainim friwe i go daun long taun na kamap long Ela Bis.

Het tok bilong dispela wokabaut, we Westpac Benk i bin kamap meja sponsa, em i "Prevention is better than cure," i bin kam gut tru bikos Westpac em i wanpela bikpela benk bilong dispela kantri husat i save skulim na tokim ol wok manmeri bilong em long lukautim bodi na stap gut.

Bosman bilong Retail Benking bilong Westpac, Cameron Penfold, (sanap namba 3 long lephan) i sanap wantaim NCD Gavana Powes Parkop na lida bilong Youth for Change, Fazillah Bazari.



Bosman bilong Retail Benking bilong Westpac, Cameron Penfold, (sanap namba 3 long lephan) i sanap wantaim NCD Gavana Powes Parkop na lida bilong Youth for Change, Fazillah Bazari.

gut olgeta samting long laip bilong ol."

"Long Westpac, mipela i save tokim ol wok manmeri long stap gut, kirapim gutpela laipstail, kaikai ol gutpela kaikai long helpim bodi,

na eksasais olgeta de. Olsem na mi amamas long lukim ol wok lain long Westpac i go pas na soim pasin bilong ekasais long dispela wokabaut.

Mista Penfold i tok.

NDC Gavana Powes Parkop i bin statim dispela Wokabaut bilong Laip program long las yia na em i karim gutpela kaikai.

Planti manmeri long Pot Mosbi siti i wok long joinim NCD Gavana na ol woklain bilong em long olgeta Sande monin long dispela wokabaut.

Mista Parkop i bin tok

wanpela as bilong dispela wokabaut em long skulim ol manmeri long eksasais na stap gut.

Narapela em long mekim awenes kempen agensim ol laipstail sik olsem sik suga, kensa na sampela ol sik ol manmeri PNG i save kisim bikos ol i no save lukautim bodi gut na kaikai gutpela kaikai, Mista Parkop i tok.

OPOSISEN Lida Don Polye i sapotim ol papagraun bilong PNG LNG Projek i kisim ol mani na arapela benefit we gavman inap long givim long ol long taim yet.

Mista Polye i sapotim nupela Minista bilong Petroleum na Eneji, Ben Micah, husat i wok long hariapim ol samting long helpim ol papagraun bilong Hela, Sauten Hailans, Galp, Westen na Sentral provins long larim ol i kisim roylati, ekwiti, divelopen lev, IDG mani na arapela ol sevis gavman na projek divelopa i bin wanbel long givim long ol.

Mista Micah i bungim ol papagraun long Mande na Tunde dispela wok long Pot Mosbi, we olgeta memba, gavana, kaunsil presiden, ol siaman na papagraun lida bilong 5-pela provins i bin bung wantaim em na autim wari, hevi na tingting bilong ol.

Mista Polye i tok gavman i mas bihainim ambrela ben-

efit sering agrimen (UBSA) na givim samting bilong ol papagraun i go long ol.

"Ol papagraun i bin wet yet long kisim ol benefit bilong ol. Na mi tasol save strong na bikmaus long larim ol i kisim mani bi-long ol.

"Gavman i no ken yusim mani bilong ol pipel na kisim moa dinau mani gen. Ol papagraun inap long kisim roylati, ekwiti, divelopen lev, IDG mani na arapela ol sevis gavman na projek divelopa i bin wet yet long kisim mani bi-long ol.

"Gavman i no ken paulim 4.22 pesen Kroton Ekwiti. Dispela em i mani bilong ol papagraun na 5-pela provinsal gavman. Gavman i mas helpim ol long kisim dispela ekwiti.

"Gavman i no ken yusim dispela 4.22 pesen long kamap olsem sekyuriti na kisim moa dinau mani olsem Sovren Bond," Mista Polye i tok.

## Polye sapotim LNG papagraun

# Pacific Aria turis sip sua long Madang

James G. Kila raitim

**MOA LONG 1,500 turis i bin kamap long Madang long Sande moning long bikpela turis sip, Pacific Aria.**

Planti bilong ol turis em ol lapun na famili bilong Australia husat i mekim raun bi-long ol long ol ples insait long Saut Pasifik.

Pacific Aria em bikpela krus sip bilong P&O Cruises Australia. Ol i wokim dispela sip long kantri Holland na givim nem pastaim long 1991 olesem Ryndam. Long November 2015 sip ya i go long nupela papa bilong en P&O Cruises Australia na ol i senism nem.

Long Novemba 25, 2015 wanpela biknem musik meri na singa bilong Australia

nem bilong em Jessica Mauboy i bin senisim nem bilong sip ya i go Pacific Aria aninit long bren bilong P&O Australia. Bikpela sip ya i save karim ol turis i go long ailan long Pasifik na PNG.

Planti ol lain informal bisnis lain long maket i bin go long sip bris Madang long salim ol henkraf na ol kaving, bilum na ol nais-pela peinting long ol turis bilong Australia.

Pacific Aria turis sip i bin stop pastaim long Alotau na bihain go long Madang, na i bin go long Wewak na bai pinisim wokabaut bilong en long PNG long Rabaul.

Dispela raun bilong ol turis i kam long PNG em Swires Grup i bin redim. Long Madang em Melane-

sian Turis Sevis (MTS) i bin redim ol raun na program we ol turis i go lukim.

MTS i bin redim wanpela mini festival long Sugeng Aben Pak klostu long Madang Risot Hotel na tu i bin redim raun bilong ol turis i go long lokal viles na tu i karim ol turis raun long sip bilong en Kalibobo Spirit long Madang haba na ol ailan klostu long Madang taun.

Planti ol turis i amamas stret long mini festival long Sugeng Aben Pak bikos ol i gat sans long lukim ol tum-buna singsing bilong olgeta rijon bilong PNG.

Ol singsing grup i makim ol lain bilong Hailans, Niugini Ailans, Papua na Moma se rijon.



Wanpela turis man i amamas long bungim ol liklik pikinini long Madang. Ol foto: James G. Kila



Ol manmeri long Madang i amamas long lukim bikpela sip Pacific Aria sua Madang.

## MRDC mas autim odit ripot

MINERAL Risos Developmen Kampani (MRDC) i mas autim odit ripot bilong em long pablik na larim mipela i save, Memba bilong Kikori, Mark Maipakai, i tok.

Mista Maipakai i tok MRDC i wok long haitim ol bisnis samting na i no save kamautim ol ripot long larim ol papagraun, husat i seaholda, i save long wanem samting i wok long kamap long kampani.

Em i tok MRDC i wok long kirapim ol bikpela hotel na risot long Fiji na PNG na tu i wok long baim ol haus long Australia.

Tasol ol tru tru papagraun husat inap long kisim benefit long MRDC i no lukim wanpela gutpela samting i kamap long laip bilong ol na ples bilong ol.

Mista Maipakai i tok futsa

jeneresen fan bilong MRDC i mas salim ol pikinini bilong ol papagraun i go skul ovasis na kisim gutpela edukesen.

"No gat wanpela pikinini bilong wanpela papagraun i skul long Amerika long kisim masta o dokta digri. Ol yang-pela pikinini em i futsa bi-long dispela kantri na dispela MRDC inap long yusim dispela fiutsa jeneresen fan long skulim planti yangpela pikinini bilong ol papagraun," Mista Maipakai i tok.

Mista Maipakai i tok menesmen straksa bilong MRDC i mas senis na larim narapela kampani i menesim o invesmen fan bilong MRDC.

"Mipela i laikim MRDC long kisim dispela 2 pesen roylti bilong ol papagraun. Em i no ken menesim dispela mani.

"Larim narapela kampani i menesim ol invesmen fan bilong mipela. Mipela i laikim ol laisensd invesmen menesa na ol laisensd fan edministreta long lukatim mani bilong ol papagraun," Mista Maipakai i tok.

MRDC i wok long mekim planti gutpela invesmen long Fiji na long PNG yet. Long Fiji, wanpela biknem hotel, Pearl Haba Risot, bi-long MRDC bai kamap bikpela moa bikos gavman bilong Fiji bai givim sampela moa graun long larim MRDC i skruim dispela hotel.

Long Pot Mosbi, MRDC i wok long kirapim nupela Star Mountains Plaza, we dispela hotel bai lukim wanpela biknem hotel brend, Hilton Hotel, tu bai kam kirap long sevim APEC bung long yia 2018.

BIKPELA kopa main bilong kantri, Ok Tedi Maining, bai op gen long mun Mas dispela yia, Praim Minista Peter O'Neill i tok.

Mista O'Neill i autim dispela toktok las wik long bung bilong Lidas Samit long Pot Mosbi.

"Mi laik tok tenkyu long menesmen bilong Ok Tedi Maining, husat i wok hat tru long opim gen dispela bikpela main bilong yumi long namba wan de bilong mun Mas.

Ok Tedi i bin pas las yia long mun Ogas taim san i bin hot na draim ples, na wara level bilong Flai Riva i bin go daun.

Tasol dispela main i save mekim na givim bikpela mani i go long gavman na holim strong ikonomi bilong dispela kantri we 1,500 manmeri tu i save wok long hap.

Menesmen i bin pasim gen o opim main gen, dispela i kam wantaim ol

bikpela hot san na draut i kamap. Tasol menesmen bi-long kampani i bin yusim dispela sans long mekim sampela riviu na sekim sam-pela namba wan samting bi-long dispela bisnis," Mista O'Neill i tok.

Mista O'Neill i tok gavman i nau stap gut na i amamas olesem Ok Tedi bai op gen.

"Ok Tedi bai mekim bikpela winmani bikos menesmen na bod i mekim sampela gutpela disisen long larim bisnis i katim daun sampela mani na sevim moa mani

"Taim gavman i bin tekova long Ok Tedi, planti manmeri i no bin wanbel long dispela desisen bilong gavman long kisim Ok Tedi.

"Em i laik bilong gavman long kisim dispela maining na mekim bisnis. Tasol i gat ol salens i stap.

"Sapos mipela i laik pasim gen o opim main gen, dispela i kam wantaim ol

salens. Tasol Ok Tedi bai sapotim ikonomi biong yumi long planti yia long bihain-taim.

Menesing Dairekta bilong OTML, Peter Graham, i tok OTML i lukluk long opim gen ol main operesen tasol tok orait i mas kam pastaim long Mineral Risos Atoriti (MRA) aninit long stetutori setfi.

"Mipela i amamas long gobek long wok tasol mipela i mas putim sefti i go pas na larim wok i kamap gutpela. Ol samting mipela i lainim taim maining i bin pas i mas helpim yumi long opim main gen," Mista Graham i tok.

Ok Tedi maining opresen i pas na kampani i tingting long katim daun kos bilong ranim maining opresen.

Dispela i lukim planti ol wok manmeri bilong OTML i lusim haus long Tabubil na Kiunga taim OTML i salim ol haus na arapela properti bi-long kampani.



24/09/2015

# TruCare em nupela Trukai Industri Ltd CSR bren

TRUKAI Industri Limited i gat nupela CSR bren, TruCare.

TruCare we i stap long stretim laip bilong ol lain long rurel na eben tau wantaim long stap helti taim ol i kaikai helti kaikai ol i redim long kain kain stail.

Insait long dispela yia nau, kampani i mekim planti donezen bilong rais pinis i go long Maun Hagen Jeneral Haus sik na long Yut Wit a Misin medikal sip taim em i bin stap sua long Pot Mosbi basis long las mun.

Bihain long planti yia long dispela namba wan na bikpela rais kampani bilong Papua Niugini, Trukai i wokim planti samting. Em i kamapim nupela standet insait long kampani ol i kolim Kopret Sosel Responsibiliti CSR, wantaim nupela nem TruCare bren.

TruCare bren i lukluk long helti laip na long ol PNG populesen i kisim strong olsem na TruCare bai i stap long rurel ples na long eben tau wantaim nau we bilong wok we i stap pinis.

Strong bilong Trukai long helpim ol komuniti i stap longwe long taun, i lukluk long strongim 'Helti Kaikai', olsem as tingting bilong kaikai gutpela helti kaikai.

Wantaim malaria, sik bilong ol pikinini, na tubekulosis i stap yet long ol rurel komuniti, wok bilong rais long kamapim gutpela banis bilong stopim kain kain sik em i kamap bikpela hap bilong plen bilong CSR bren.

Narapela hap bilong TruCare bren i lukluk long 'Helti Laip' long eben eria, wantaim tingting bilong daunim ol hevi bilong ol pipel, wantaim sapot bilong ol spots program na ol narapela samting we i namba wan long Trukai long PNG. Kampani i save toktok strong long wok bilong ol meri long egrikalsa na bisnis em i hap bilong CSR plen tu. Sif Eksekutiv Opisa (CEO) bilong Trukai, Greg Worthington Eyre, i tok kamap bilong TruCare i stap long strongim gen laik bilong Trukai long sevim Papua Niugini.

"Trukai Industri i save gut long hevi bilong El Nino na ol tait wara insait long PNG. Trukai bai traum long helpim ol pipel husat i kisim taim long ol taim nogut olsem. Ol netsurel disasta em ol kain taim we no gat man bai abrusim na em i save bagarapim planti kaikai gadan we ol pipel i save kaikai na stap.

Trukai em i wanpela namba wan feveret kaikai bilong ol pipel bilong Papua Niugini haus lain na long ol kain taim bilong hevi, TruCare em i sambai long lukautim ol pipel long ol bai stap strong na helti," Mista Worthington Eyre i tok.

Dispela yia, Trukai i bin givim pinis 200 bek 10kg rais i go long 4-pela haus sik long ailan, hailans na Momase rion. Trukai i givim wanpela tan rais i go long Yut Wit a Misin (YWAM) medikal sip pastaim long em i ran i go long Galp provins na ol narapela hap bilong Sauten Rijon.

Long olgeta mun, Trukai i save salim rais long ol pikinini i no gat papa na mama we ol i save stap long Life PNG Care senta long Gerehu, ol yut i no gat wok long PNG City Mission (Pot Mosbi na Lae) na ol pipel husat i gat bagarap long sampela hap bodi bilong ol long Cheshire Homes.

"Trukai em i no rais tasol. Em i bilong ol pipel, komuniti, egrikalsa na save. Mipela i bin stap long PNG winim 45 yia na mipela i laik stap yet na givim kaikai long wanpela helti nesen inap long planti moa yia," Mista Worthington---Eyre i tok.

**Oi volantia bilong YWAM Medikal Sip wantaim ol wokman na meri bilong Trukai Industri bihain long ol i givim donezen i go long sip.**

Poto: Trukai Industri.



## Madang-Ramu Haiwe i bagarap

Mathew Yakai bilong MY Midia na Nius Ejensi i raitim

Ol pipel na ol bisnis kampani na ol papa bilong trak bisnis wantaim olgeta lain husat i save ran long Ramu-Madang haiwe i no save nau sapos dispela em i hap bilong nesenel haiwe o wanpela bus rot bilong loging kampani.

Ol pipel husat i save baim takis olsem man i raitim dispela nius stor i tingting planti long wanem hap ol takis mani bi-long ol i save go.

Ol lokal memba bilong palamen i pasim ai tru long dispela hap bilong nesenel haiwe, we i holim laip lain bilong developmen. Madang Provinsal Woks

Menesa i wok long taitim bun long painim mani bilong stretim dispela hap bilong haiwe.

Madang provins i gat ol bikpela projek na kampani olsem Ramu NiCo Main, Mareng Main, RD Tuna, RD Cannery, PMIZ na ol bikpela institusen olsem Divain Wod Yunivesiti, Madang Tisa Koles na and Madang Teknikal koles, tasol bikpela haiwe rot i go long Lae na ol Hailans rion em i bagarap olgeta.

Emi nap long kamapim birua long rot long wanem ol trak bilong karim ol fiul i wok long kapsait long rot na pundaun long sait, sait bilong rot bikos rot i no gutpela. Ol pasindia i go i kam i save

pilim pen long ran long rot na planti taim ol yet i save pulim ol pasindia bas ol i ran long en.

Dispela kain pasin em i save kamap planti long hap rot insait long eria bilong Usino-Bundi ilektoret olsem long Ono maunten.

Ol rot no gut i soim piksa nogut nau long kantri we i gat LNG Projek na tu em i wok long redi long holim ol bikpela intenesen na rijonal iven olsem 2018 APEC Miting. I luk olsem gavman i no gat strong long helpim ol pipel bilong em tasol i wok long soim giaman piksa long ausait lain olsem olgeta pipel long Papua Niugini i gat gutpela sindau.

# Not Waghi Memba givim DSIP Akwital Ripot



Difens Minista na Memba bilong Not Waghi, Dokta Fabian Pok i givim 2015 DSIP akwital ripot bilong distrik i go long Seketeri bilong Dipatmen bilong Rurel Implementesen na Developmen, Paul Sai'i wantaim ol Distrik opisa bilong Not Waghi long Waigani, NCD. Poto: DIRD midia

**DIFENS Minista na Memba bilong Not Waghi ilektoret long Jiwaka provins, Dokta Fabian Pok i bringim bek ol fainens na implementesen ripot bilong 2015 K15 milien Distrik Sevis Impruvmen program akwital ripot i go long Dipatmen bilong Implementesen na Rurel Developmen (DIRD) long dispela wik.**

Mista Pok i tok tenkyu long sapot bilong dipatmen na em i askim olsem ol i mas wokim yet dispela kain program.

Not Waghi distrik em i namba wan long hailans rion long bringim bek DSIP akwital ripot bilong en.

"Ol DSIP fan alokesen bilong gavman i go long wan wan distrik i kamapim planti gutpela samting long sait bilong developmen bilong gutpela helti senta, etpos, polis stesen, rurel ilektrifikasi, wara saplai, rot na bris.

"Dispela em i namba wan taim long gavman i putim wanpela bikpela hap mani long developmen ol distrik. Nau em i samting bilong ol memba long yusim gut mani," Mista Pok i tok.

Em i tok distrik i no kisim

yet K250, 000 diskresoneri hap man bilong 2014 na 2015 non-diskresoneri fan, long mak bilong K500, 000.

Dokta Pok i givim ripot bilong mani wok insait long distrik bilong em, long soim olsem ol memba bilong palamen i mas mekim ripot bilong ol publik mani na long singaut long Dipatmen bilong Fainens na DIRD long wokim ol sekap na lukim long bilong ol na holim stret wanem smating ol akwital ripot i tok long en.

Mista Pok i tok olsem i gat K15 milien i stap bilong olgeta distrik long wokim ol ki gavman

praioriti eria olsem helt, edukesen, ikonomik ektiviti, infrastraksa, administresen na disasta.

Tasol Not Waghi i kisim K11, 550,000.00 tasol.

Em i tok, dispela fainensel ripot i karamapim taim namel long Janueri i go Desember 2015.

Tasol Dokta Pok i tokaut olsem mani mak bilong K4.6 milien DSIP fan we ol i bin basetim bilong ol impek projek long distrik i bin lus long han bilong ol stilman long

Not Wahi Distrik Treseri na Distrik Edministresen long 2014.

Dispela paul pasin i bagarapim ol wok projek bilong; rurel ilektrifikasi, polis haus, wara

saplai projek, saplai bilong ol kapa bilong ol komuniti, husat i katim ol timba bilong ol yet wantaim ol wokabaut somil, na ol haus maked.

Tasol, Minista Pok maski ol hevi i stap, distrik i mekim gutpela wok long kamapim ol strongpela kain projek olsem rurel ilektrifikasi, long olgeta lain i kisim pawa i karamapim 110 kilomita i go long olgeta kona bilong Not Waghi.

Sampela projek we i mas kamap ples klia em long ol haus bilong polis na ol matiriel bilong haus we ol i wokim pinis, ol L40 set bedrum haus long Banz na Nondug Polis bareks.

Sampela arapela projek olsem rurel wara saplai, sponsa bilong ol teseri skul sumatin wantaim ol liklik na namel sais bisnis wok bilong helpim ol yet, long transpot na ikwipmen na long putim ol haus long maked.



Ol pasindia bilong PMV bas i pulim bas long Ono maunten long Usino-Bundi hap bilong Madang-Ramu haiwe. Poto: Mathew Yakai - MY Midia na Nius Ejensi

# Not Kwinslan Cowboys i daunim Leeds long Wol Klap Salens

...Garbutt i paitim Tamaou



Not Kwinslan Cowboys i amamas long ol i daunim Leeds Rhinos long Wol Klap Salens long Headingley.

NAMBA WAN piliai bilong Not Kwinslan Cowboys, Johnathan Thurston, i kirapim tingting bilong ol Not Kwinslan na kisim ples long ragbi lig salens long Wol Klap taim ol i daunim Leeds 38-4.

Tupela tim i pinis wantaim 12-pela piliai bihain long ol i rausim prop bi-

long Leeds, Mitch Garbutt, i boksenim prop bilong Cowboys, James Tamou, long fes bilong em.

Ol i bin rausim Tamou long pilai graun.

Cowboys i putim 6-pela trai long namba tu hap bilong pilai. Insait long dispela, Thurston i putim tripela trai na

strongim premia pilai long dispela graun.

Long Namba tu hap bilong pilai, Cowboys i soim stail bilong em we ol i bin putim namba wan trai long 90 sekens.

Cowboys i yusim wankain trik bilong ol na daunim ol Inglan.

## Melbourne City i daunim ariners



Storm Roux i kisim bikpela bagarap long lek bilong em long namba tu hap bilong pilai.

MELBOURNE City i pilai isi na daunim ol Central Coast Marniers long A-Lig, 4-1.

Mitch Austin i kisim wan-pela poin na ol Marniers i stap pas tasol City wasim poin bi-long ol wantaim naba tu hap gol we Patrick Kisnorbo, Ben Garuccio na Aaron Mooy i putim tupela gol.

Mariners i guria long ol ius bikos, ol i win long

namba 22 resis pinis na ol ting olsem ol bai win tasol, nogat.

Ol i hapim piliai bilong ol City, Storm Roux, long pilai graun na karim i go ausait long em i bin kisim bikpela bagarap long lek.

Namba wan piliai bilong Central Coast, Luis Garcia, i no bin pilai tasol ol i lid long poin long namba wan hap.

## Chelsea tromoi Manchester City na Crystal Palace daunim Hotspur



Midfilda bilong Chelsea, Bertrand Traore, i amamas long daunim Minchester City wantaim 5-1.

## Kyrgios i winim Marseille Open



Nick Kyrgios i amamas bihain long em i bin daunim Marin Cilic na winim Marseille Open.

NAMBA WAN taim bilong Nick Kyrgios long winim ATP Wol Toua taitel bihain long em i daunim piliai, Marin Cilic, husat i save stap long namba foa ples wantaim 6-2, 7-6 long fainel bilong Marseille Open.

Nick i bin go insait long fainel taim em i bin daunim tupela top 10 piliai, Thomas Berdych na Richard Gasquet, na kala bilong em i winim olgeta pilai mi resis.

Dispela win bai hapim em het long go insait long wol renk.

"Mi no ting olsem mi bai

winim dispela taitel bikos mi no bin pilai insait long sam-pela wikk. Tasol long namba wan raun, mi bin pilai gut na kisim moa strong taim mi bin

winim olgeta pilai mi resis.

...West Ham i daunim Rovers

CHELSEA i daunim disisen bilong Manchester City na daunim wantaim 5-1 long namba 5 long FA Kap na ol i joinim wantaim birua long London, Wes Ham na Crystal Palace, long kwata fainel.

City i bin pilai long Livapul long Lig Kap fainel na i bin winim tripela resis olgeta.

Long wankain taim, Crystal Palace i kisim wanpela poin 1-0 long Premia Lig na

daunim Tottenham Hotspur. West Ham i daunim ol sempion tim, Blackburn Rovers, 5-1. Dimitri Payet na Emmanuel Emenike i skoarim 4-pela skoa.

Manchester City i lus bikos bos bilong ol, Manuel Pellegrini, i mekim planti senis long FA Kap.

Tottenham i win na i go antap long namba tu long Premia Lig.

## Nomura i daunim tupela long winim taitel



Haru Nomura i soim kala bilong em gut long fainel raun bilong em long Grange Gof Klap.

JAPAN piliai, Haru Nomura, i daunim tupela namba wan bipo piliai bilong gof, Lydia Ko na Karri Webb, long winim taitel bilong Australian Open taiten bilong ol meri long Grange Gof Klap long Adelaide.

Nomura i kisim dispela taitel long Febueri 18 na dispela de i kamap bikpela de bilong em.



# Charlie amamas long Ramu NiCo givim em wok

LONG Basamuk Rifaineri i gat wanpela strongpela na hatpela wokman bilong Ramu NiCo nem bilong em Charlie Jowia. Dispela wokman save holim ki bilong olgeta bikpela weahaus we kampani i save putim ol saplai na samting bilong wok insait long en.

Charlie em gutpela wokman na ol lain bos bilong em blong China i gat bilip na trast long em.

Charlie i kam long hatpela rot stret long kamap long wanem mak nau em i stap tude. Olsem na em i save givim olgeta taim bilong em long wokim stret wok bilong Kampani wantaim olgeta bilip long bel tingting bilong em.

Charlie i pinisim gret 10, tasol em i no inap go het long edukesi bilong em bikos long hevi bilong skul fi pastaim. Taim em i stap natting long haus long Finsh Rot long Nu Taun long Madang we i save pasim taim bilong em wantaim wanpela poro bilong em long go wokim wok welding long namba 2 Didiman woksop klostu long Wagol. Em save wokim dispela ol wok i go igo na bagaros ya i kisim stret ol stail na save long wok bilong weldim na wokim ol kakao fementri.

Charlie i no go long skul long wok welding. Em lukim long ai tasol na yusim save bilong em long wokim wok na bagaros ya i kamap olsem resa man long holim welding masin na wokim ol kakao fementri.

"Mi no go long bikpela skul, tasol mi givim bikpela tenkyu na glory i go long Papa God long soim mi rot na givim mi save kwiktaim long wok bilong welding," Charlie i tok.

Planti ol rurel lain long Madang provins i wok long luksave na amamas long wok bilong Charlie, na sampela taim ol i save kisim em igo long welding ol nupela kakao fermenteri bilong ol.

Long 2008 wok konstraksen i

kamap long Basamuk na Charlie em laki tru long kisim wok wantaim JT Konstraksen, wanpela kontrakta long dispela taim long projek.

Long 2011 pastaim siaman bi-long Basamuk Lenona Asosesen. Lima Mullung i luksave long gutpela wok bilong Charlie i raitim referens bilong em na bagaros ya igo wok wantaim Ramu NiCo (MCC).

Tude, Charlie Jowia em i bikpela mangi long sait bilong em yet. Bagaros ya i save holim ol ki bilong seven-pela weahaus bilong kampani long Basamuk Rifaineri.

Charlie Jowia save lukautim tu sampela ol lain wokman aninit long em husat i save rausim ol kago long sip i bringim saplai i kam, na tu em save lukautim lis bi-long ol local wok lain husat bai lodim nikel beg i go antap long sip long go ovasis.

Las yia Charlie wantaim sampela ol wok lain long Basamuk Rifaineri i bin stap insait long wanpela skils trening. Dispela trening i givim ol wokman sans long lainim ol wok bilong kain kain ol krein, testim ges, trening long ol ekplosiv na skafolding.

"Mi laik tok tenkyu long Ramu NiCo long givim mi kain ol trening olsem bikos em bai helpim mipela long lainim wanem ol skils mipela no save na dispela bai helpim mipela long ol wok bilong mipela," Charlie i tok.

Charlie i tok tenkyu na wanbel long Ramu NiCo long givim trening bikos maski olsem wol prais bilong nikel i pundaun na planti kampani i no peim wokman na sampela i rausim ol wokman, Ramu NiCo i go het yet long lukautim ol wok lain

Dispela skils trening we Charlie wantaim ol arapela wok lain i stap long en em wanpela 100 % PNG kampani ol i kolim Multi Skills Trening Institute long Lae i bin go long Basamuk na kamapim.

Giving skils trening long ol wok-

man i em wanpela bikpela astingting Ramu NiCo i gat long maining operesin bilong en long Madang provins na PNG. Kampani i gat tingting long wokim kamap wanpela wok fos we i gat moa skils na save long bringim kamap gutpela prodaksen na go bungim dis-

ain wok mak bilong en.

Vais Presiden bilong Ramu NiCo, Xu Jian i tok Ramu NiCo i gat bikpela bilip na lewa long ol wokman bilong en.

VP Xu i tok long wok stong na lukim gutpela prodaksen mak Ramu NiCo i nidim ol gutpela na

strongpela wokman bilong wok long promotim sefti.

Mista Xu i askim olgeta Ramu NiCo wokman long mekim gutpela yus long ol trening na lainim moa skils long redim ol yet long wanem wok na posisen i bai gat long bi-hain taim.



Charlie Jowia i sanap fran long wanpela bikpela weahaus long Basamuk Rifaineri



Charlie Jowia nau i gat opis bilong em na save lukautim ol wok lain olsem tim lida



135 KM Slurry Pipeline



BSK Refinery



# Klap i mas winim mak

OL nupela klap husat i kisim tok orait long resis long premia ragbi lig reis long PNG, Digicel Kap, bai bihainim ol rul long winim mak bipo long resis.

Nupela Edministreta bilong PNG Nesenel Ragbi Lig, Stanley Hondina, i tok olsem bod bilong PNGRFL i kisim pas bilong tripela nupela klap olsem NCD Lagatois, Sentrel Sif na Kundiawa Warriors long resis long Digicel Kap.

Em i tok, ol bod i lukluk long reis bilong ol long winim mak na ol bai mekim disisen klostu taim.

Tasol, ol nupela klap i mas save olsem em bai no inap long kisim wapela de o

wapela wik long ol bai stretim dispela long ol bai kamap kwalifai, nogat.

Hondina em i bipo ragbi lig pilala na kosa, i tok, "Dispela em i wok bilong PNGNRL long lukautim ol nupela klap long bihainim ol step na winim mak bilong resis.

"Em bai kisim planti taim long winim dispela mak we PNGNRL i putim. Em bai kisim planti taim long PNGNRL bai toksave, sapos yu i winim mak bilong resis o no gat."

PNGNRL i toksave long polisi bilong em olsem olgeta provins i ken i gat wan wan tim, tasol ol bod bilong PNGNRL bai mekim disisen long wan wan provins ken

mekim moa long wapela tim.

Ol i mekim dispela toktok bikos ol i lukim tupela provins, NCD na Simbu, i salem tim moa long wapela long winim resis long pilai long Digicel Kap resis long dispela yia.

NCD i gat Pot Mosbi Vipers na Simbu i gat TNA Lions, husat i karim provinsal plak bilong tupela. Tasol, nupela tim, Lagatois long NCD na Warriors long Simbu, i resis tu long winim mak bilong pilai long Digicel Kap resis olsem namba tu tim.

"Ol bai lukluk gut long kamap wantaim wapela disisen we ol dispela tim bai pilai o no gat," Siman bilong PNGNRL, Sudhir Guru, i tok.

# Tahiti i kamapim histori wantaim brons medal

## TAHITI i winim brons medal

**long Badminton Osenia**

**Miks Tim Sempionsip long**

**Oklan, Nu Silan, long las wik**

**Fonde bihain long em i daunim**

**Nu Kaledonia, 5-0,**

**long X-TRM Not Haba Senta.**

Long Mik Dabol, Leo Cucuel na Aurelie Bouttin, i sti- aim tai kwiktaim egensim tupela strongpela pilaea bilong Nu Kaledonia, Loic Mennesson na Johanna Kou, long stat bilong pilai insap pinis bilong pilai na i win wantaim 21-14, 21-14.

Cucuel i bin tok bipo long resis olsem Tahiti i lukluk long winim brons na dispela driman i karim kaikai long Man Singel resis we Quentin Bernaix i daunim Thomas Lahaut 21-16, 21-16.

Long Meri Singel, Chloe Segrestan i kamapim nem bilong em taim em i daunim strongpela pilaea bilong Nu Kaledonia, Cecilia Moussy.

Moussy i winim namba wan resis, 21-6, tasol resis i kamap strong long namba tu resis na Segrestan i wasim em wantaim 22-20.

Segrestan i kisim malolo

liklik na em i pasim 23-21

win long namba tri winim

namba wan medal bilong

Tahiti.

Wankain resis i go het long Dabol resis bilong ol man. Cucuel na Hugo Sautereau i daunim Lahaut na Mennesson 21-15, 21-17.

Aurelie na Coralie Bouttin bilong Tahiti i daunim Kou na Moussy 16-21, 21-15, 21-16, long Dabol resis bilong ol meri na Tahiti i kisim biknem.

Chloe Segrestan i amamas long stail pilai bilong em yet, tasol em i givim bikpela rispek long ol tim poro na Kosa Cucuel em tu.

"Mi amamas long olgeta memba bilong tim na mi amamas tu long mi yet bikos mi bai kamap 14 yia long Mande. Mi i winim namba wan brons bilong Tahiti em i bikpela samting.

"Namba wan resis em hat tumas, tasol mi pilai gut long namba tu resis na putim olgeta presa i go long birua pilaea bilong mi.

## Sif i redi ...Haoda sapotim nupela Sentrel Klap

SIAMAN bilong nupela Sentrel Sif klap, Jack Keda, i strongim olsem Sentrel Provinsal Gavman em i bikpela sponsa bilong Sentrel Sif.

Keda i tokaut long dispela sponsasip long las wik Fonde.

"Mi stap long wapela bung wantaim Gavana bilong Sentrel Provins, Kila Haoda, na Gavana i tok strong olsem Provinsal Gavman bai kamap bikpela sponsa bilong Sentrel Sifs," Keda i tok.

"Olgeta tripela memba bilong Sentrel provins i sapotim em na Sir Puka Temu tu i promis long givim K200,000.

"Haoda i sapotim em bipo yet taim ol i kamapim Sentrel

Premia Lig resis long 2014.

"Olgeta pilaea bilong Sentrel Sif i kam long Sentrel Provinsal Gavman em i bikpela sponsa bilong Sentrel Sif.

"Nau, mipela i gat 100 pilaea i stap long pul na mipela bai makim namba wan pilaea na makim 30 skwat bihain long fainel bilong traum pilai. Bihain mipela bai makim ol skwat stret, husat bai resis long 2016 Digicel Kap resis," Keda i tok.

Papua Niugini Ragbi Futbal Lig i gat gutpela tingting long ol nupela klap i laik winim mak bilong Papua Niugini Nesenel Ragbi LIG (PNGNRL) na i laik joinim resis long Digicel Kap.

"Mipela i painimaut pinis asples pilai graun bilong mipela long Wagula Pak

long Kwikila, Sentrel Provins, na bikpela sponsa bilong mipela em i Sentrel Provinsal Gavman.

"Dispela em i tupela bikpela mak we PNGNRL i putim na mipela i winim dispela mak nan au mipela i wet long PNGNRL i ken strongim mipela long kamap klap bilong 2016 Digicel Kap resis," Keda i tok.

Keda i tok moa olsem Wagula Pak em i bamba wan asples pilai graun bilong ol Sif, tasol mipela i mekim plen pinis long painim wapela graun nating insait long Konebada Petroleum Pak i putim long kamapim Stet bilong Art Fesiliti bai kamap asples pilai graun bilong Sentrel Sif long bihain.

## SP Brewer i sponsa long Ragbi yet

SP BREWERI i sponsa yet long Ragbi aninit long bia bren Ekspot Liga we em i tokaut long K40,000 sponsasip long

Papua Niugini Ragbi Futbal Yunion (PNGRFU) long nesen 15's sempionsip na nesen sevens resis long dispela yia, 2016.

Dispela mani em SP Brewer i bin givim long het opis bilong em long Pot Mosbi long las wik Fonde.

Sif Ekseyutiv Opisa bilong

PNGRFU, Frank Genia, i tok tenkyu long SP Brewer i sapot yet long divelopim kantri aninit long ragbi.

"Sapot bilong SP Brewer i bai strongim PNGRFU long promotim nupela program bilong em insait long kantri ol nupela namba wan pilaea i kamap.

"Patnasip namel long SP Brewer i na PNGRFU bai helpim long strongim divelopmen bilong ragbi insait

"Ekspiriens bilong birua

pilaia bilong mi i no daunim

tingting bilong mi bikos mi

pilim sapot bilong tim poro

bilong mi na bungim mak bi-

long winim pilai," Segrestan i tok.

Cucuel i apim nem bilong olgeta pilaia.

"Mi amamas long olgeta pilaia bikos ol i no gat planti presa.

"Chloe i pilai gut tru, na Aurelie na Coralie soim stail bilong tupela tu long Dabol resis bilong ol meri," Cucuel i tok.

Birua pilaia bilong ol, Fabian Nadmimin i tok, no gat wapela asua i stap long mak we ol i bin daunim Nu Kaledonia.

"Tingting bilong mipela i no strong em i no risen bi-long Nu Kaledonia i lus, nogat. Nu Kaledonia i lus bikos planti ekspiriens pilaia i no pilai gut.

"Tahiti i kam long nara-pela stail long dispela resis na mipela i no bungim dispela. Mi no pilim orait long dispela," Nadmimin i tok.



Piksa i soim fainel resis namel long tupela tim, JIC Taiteans i putim blek siot na Buria Reds i putim ret siot, long Kone Tigers pilai graun. Tupela i resis long go insait long NCD Lagatois. Titans i win na Reds i lus. Tasol Papua Niugini Nesenel Ragbi Lig (PNGNRL) i no larim Logatois long joinim Digicel Kap resis bikos ol Lagatois i no winim mak we bod bilong PNGNRL i putim. Ol Lagatois bai no inap resis long Digicel Kap long dispela yia, 2016, bikos ol i no gat wapela asples pilai graun. Piksa: Philemon Tame.



Piksa i soim ol opisal na pilaia bilong Papua Niugini Ragbi Futbal Yunion (PNGRFU) i sanap bung na soim sek mani, K40,000, we SP Brewer i givim long PNGRFU long las wik Fonde. Piksa- Nicky Bernard

# PNG bai go pas long Taekwondo kwalifai

**PAPUA Niugini Taekwondo Federesen bai go pas long Osenia Kwalifai long Tau-rama Akwatik Senta long Pot Mosbi long Sarere.**

Ol etlit bilong Australia, Nu Silan, Tonga, Solomon Ailan, Fiji na Guam bai pilai long dispela wanpela de resis.

Foapela etlit bai makim Papua Niugini na dispela em i mak aninit long Osenia Taekwondo Union (OTU) rul.

Dispela foapela etlit em Maxemillion Kassman, husat

bai resis long 68kg divisen na Jonathan Paschalis bai resis long 80kg divisen aninit long grup bilong ol man.

Grup bilong ol meri em Rose Tona bai resis long 49kg divisen, na Samantha Kassman bai resis long 67kg divisen.

Nesenel Kosa, Edward Kassman, i tok, "Mipela i gat tripela traime seleksen na namba 4 i bin kamap long pinis bilong las yia, na ol i makim 4-pela man pilaia na

4-pela meri pilaia long mekim wok redi long dispela resis.

"Tasol, mipela i no inap long larim ol 8-pela pilaia long resis bikos OUT i tokim mipela long makim 4-pela pilaia.

"Tim i mekim gut long trening bilong ol insait long tupela mun i go pinis. Maxemillion i trening long Australia na em bai kam bipo long pilai bai kamap long Sarere na Joinim tim.

## Yunaitet FC i daunim Rapatona

Pilaia bilong Hekari Yunaitet FC putim blek siot i abrusim bal na kalap long baksait bilong birua pilaia bilong em. Rapatona pilaia tu i abrusim bal na bal i stap long baksait bilong tupela. *Piksa: Nicky Bernard*



HEKARI Yunaitet FC i daunim ol Posman Kua Asi Lawyers Rapatona, 1-0, long Nesenel Soka Lig resis i bin kamap long las wik Sarere.

Ol Rapatona i tingting long salensim ol Hekari Yunaitet gen na dispela resis i kamap asde, Trinde, long Bisini Soka pilai graun.

Rapatona i soim olsem ol i pilai gut long las Sarere, tasol ol i abrusim planti kik bilong ol na ol i misim sans bilong ol.

Ol i tingting long pilai gut long gem i kamp long Trinde.

Hekari i no pilai gut tasol laki tru ol i winim dispela resis.

Ol Rapatona pilaia lan Yanum, Samuel Kini, na Ronny Henry i stiaim bal gut tru na yanpela pilaia bilong ol, Patrick Aisin a Pettyshen Elizah, i putim moa presa long birua pilaia bilong ol.

Koria Upaiga i yusim olgeta skil bilong em long putim gol na em i bin stap long presa long kisim Golden But awod.

Wantaim 4-pela raun i stap yet long stey tu bilong nesnel sempionsip lig.

Hekari Yunaitet bai go long Lae long pilai egensim Lae Siti dwellers long Sarere.

Welgris Morobe Yunaitet bai go long Pot Mosbi long pilai egensim PKA Rapatona.

Long Noten konferens, Welgris bai pilai egensim Siti Dwellers bihain long 2-0 long opening raun bilong sempion lig.

Dwellers i lukluk long pinisim raun wantaim tupelo namba wan pilaia bilong ol, Raymond Gunemba na bipo Rapatona pilaia, Michael Foster.



*Piksa: Nicky Bernard*

Piksa i soim Hekari Yunaitet FC na Posman Kua Asi Lawyers Rapatona i pilai long Bisini soka pilai graun. Rapatona pilaia wantaim Yelopela siot na Yunaitet FC wantaim blekpela siot i bihainim bal. Hekari Yunaitet FC i daunim ol Rapatona, 1-0, long las wik Sarere.



Dispela piksa i soim ol yangpela man i holim Wait Ribon De plej bilong Lig Bilong Laif. Lig Bilong Laif i mekim tok save long Tokarara, Pot Mosbi, long strongim vailens egens ol meri i mas stop. *Piksa: Lig bilong Laif Midia.*



Yangpela boi i soim kala bilong em long em bai kamap wanpela namba wan spot etlit bihain. Em i stap wantaim long Wait Ribon De bilong Lig Bilong Laif long Tokarara, Pot Mosbi.

*Piksa: Lig bilong Laif Midia.*

## Nupela klap i no winim mak

**Philemon Tame i raitim**

TRIPELA nupela klap, Sentrel Sif, NCD Lagatois na Kundawa Warriors, i raitim pas long Papua Niugini Nesenel Ragbi Lig (PNGNRL) long joinim Digicel Kap i no winim mak long resis bilong ol.

Jack Kedea i go pas long Sif na i raitim pas i go long PNGNRL na preisden bilong Pot Mosbi sebabon ragbi lig, Peter Wai, i go pas long NCD Lagatois. Richard Sinamoi Sam Goia i go pas long Simbu Warriors, tasol olgeta i no winim mak we PNGNRL i putim.

Nupela Edministreta bilong PNGNRL, Stanley Hon-

dina, i tok, "Long kamap long mak bilong painimaut tim husat i winim mak i save kisim planti taim na PNGNRL bod i wok strong long lukim ol mak bilong nupela tim, sapos ol i winim ol dispela mak o nogat.

"Tripela nupela tim i no winim mak bilong PNGNRL bod bikos ol i no gat gutpela asples pilai graun na dispela em i namba wan mak we PNGNRL bod i lukluk long en.

"Narapela astingting we Simbu Warriors i no kwalifai long resis bikos TNA Lion em i provinsal tim i makim Simbu Provin. Mipela bai no inap long larim tupela tim long wankain provins,"


Hondina i tok.

Hondina i tok moa olsem ol i tok save pinis long ol nupela klap long wanem kain astingting ol i no kwalifai long go insait long Digicel Kap resis.


"PNGNRL i tokim ol tu olsem ol bai wok wantaim ol long winim ol dispela mak long ol i ken resis long yia i kam, 2017, sapos ol i amamas long joinim Digicel Kap resis.

"Dispela em i wok bilpong mipela long skruim moa kala bilong resis.

"Resis bilong joinim Digicel Kap resis i no pinis yet na ol bait ok aut long midia inap PNGNRL i pinisim dispela wok."



**BAL WE:** Elizah bilong Rapatona FC na Kusunan bilong Hekari FC i reis long hetim bal long NSL pilai bilong long wiken. Hekari i win 1-0.



Ol poto: Nicky Bernard



**TIM TURAGU:** Gavana kap sempion bilong 2016 tim Turagu.



**MIPERA TIGER YA:** Ol yangpela Sait Sena Tiges husat i save resis long Gordons tas.



**AIYO EM LUS LONG HAN YA:** Pilaia bilong Madang Fox i lusim bal taim pilai bilong narapela tim i ran kam long em long ragbi yunien 7 Gavanas Kap.




**KISIM YA:** Pilaia bilong KB Eels i pasim balo long wan pilaia bilong em long Gordons tas resis.

**HAHA TRAI TAIM BILONG MI:** Pilaia bilong Turagu i redi long putim trai taim pilai bilong Haliquens i hat long takolim em.



**DIANA**  
Tuna

Niupela Swit Teist  
Nau Igat Moa Oil!



PNG's ORIGINAL TUNA

PNG MADE Manufactured by:  
RD TUNA CANNERS LTD.

# Gavman i skruim FIFA Wol Kap long Novemba



NESENEL Gavman i skruim FIFA anda 20 Wol Kap bilong ol meri i go long Novemba, 2016 na PNG bai go pas long dis-pela resis.

Minista bilong Spot na Turisim, Justin Tkatchenko, i tok olsem, hap mani bilong Pasifik Gems, K20 milien, we ol i lusim em ol bai yusim long kamapim tupela hap bilong FIFA resis.

"Tupela hap ol i makim long kamapim pilai soka pilai graun em, Murray Bareks na Bisini, we em bai inap long 5000 lain bai sindaun na lukim pilai."

"Ol bai kamapim tupela soka pilai graun insat long 6-pela mun i kam."

"Dispela tupela pilai hap em ol bai mekim

kamap liklik spot stediam," Tkatchenko i tok.

Spot Minista i tok em i wok wantaim Curtain Brothers na Gavman long pinisim wok long Sir Hubert Murray Stediam hariap, bikos ol i no wokim dispela wok hariap.

"Nau, hap mani bilong Pasifik Gems, K20 milien, em ol bai yusim long kamapim Murray Bareks na Bisini soka pilai graun," Tkatchenko i tok.

"Plen long yusim dispela K20 milien i stap pastaim, bipo long Pasifik Gems i kamap."

"Ol bai yusim K4 milien long kamapim dispela liklik stediam long Murray Bareks na wok bai stat klostu taim."

(L-R) Siaman bilong PNG Hunters, Graham Osbourne, Siaman bilong Pot Mosbi Ragbi Lig, Dokta James Naipo, Minista bilong Spot na Turisim, Justin Tkatchenko, Eksekutiv Jenerel Menesa bilong Oil Search Limited, Gereia Aopi, na Fainens Eksekutiv bilong OSL, Leon Buskens i sanap long Nesenel Futbal Stediam bipo long pilai namel long SP Hunters na Penrith Panthers i kamap. Baksait bilong piksa i soim ol sia bilong stediam bilong sindaun na lukim pilai. Long wankain hap, ol bai kamapim narapela liklik stediam we anda 20 FIFA resis bilong ol meri bai kamap long Novemba. Na, narapela wankain stediam tu em ol bai kamapim long Murray Bareks. Piksa: Philemon Tame



PMV OIL  
BILONG YUMI



**BOROKO**  
**MOTORS**

PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 8193
GOROKA	532 3552

Email: info@borokomotors.com.pg  
Website: www.borokomotors.com.pg

